

度

支

奏

議

度支奏議目錄

新餉司卷之十八

覆關外道司月報兵馬二冊互異疏

覆議遼撫題請屯田責成事宜疏

議覆城外列營京軍犒賞銀兩疏

議抵閩省援兵支過安家行糧疏

議罰侵犯王昌案內經管餉司疏

覆黔兵補食關餉貼防暫支塩菜疏

覆袁御史條陳江西加派照畝偏累疏

議覆黔中四年題留楚餉疏

回奏劄發押銀往秦選鋒行糧日期疏

題覆發過黔兵月餉疏

覆登撫孫元化議改島餉運道疏

覆浙江催餉蔣罔卿起解錢糧疏

覆科臣條議屯田寺田官米積穀四款疏

覆畿楚滇粵四省直屯田起科疏

覆唐京卿催解過楚省錢糧併舉劾疏

覆錢法堂條議三款疏

題催省直新增加派三釐疏

覆吏科條議近地州縣徑解錢糧疏

會議登島兵餉額數疏

覆津撫條陳海運十議疏

覆楚省督撫軍餉并生員優免疏

覆黔兵月餉十月爲餉疏

覆永平豫儲芻糧并減客餉主條議疏

題催省直解還援兵借過部餉疏

覆入援川兵行月兼支疏

題主客兵馬并出入大數乞從長酌議疏

度支奏議卷之十八

太子太保戶部尚書潘青畢自嚴視草

覆關外道司月報兵馬二冊互異疏

題爲冒支缺額兵糧明明有據謹虛心糾叅以清
隱弊以足軍儲事專理新餉山東清吏司案呈
崇禎四年二月二十四日奉本部送戶科抄出
遼東巡撫丘禾嘉題前事內開二月初四日據
寧前道陳新甲呈蒙案驗准兵部咨該查覈邊
鎮兵馬兵科給事中馬思理題前事等因奉

聖旨兵餉積弊難稽特設專官清覈乃各鎮仍以套
應該道餉司罪無可諉這寧前道兵馬缺額冒支
併八月分道司二冊互異是何緣故着行該督撫
按嚴查據實速奏該部知道欽此欽遵抄出到部
咨會到院備案仰道卽查八月分開報之冊因
何與餉司互異缺額緣何支糧少報何故多餉
徹底清核據實呈報前來看得道臣陳新甲之
扣存空乾等銀也蓋踵前道孫元化之良法美
意而行非冒支也元化以革冗汰浮爲補偏救

弊以故積三千餘金買車運砲以應西援造甲
買馬以赴登鎮今該道仍奉而行之實卽此意
業早申明閣部及臣衙門矣亦欲臣等預白其
心耳科臣糾駁最爲精詳臣亦咎該道失報部
科是以雖抱苦心急不得達夫侵冒惡名也卽
鄉黨自好者不爲謂忠如新甲而肯爲之乎目
今寧庫如洗臣等支撐要害每嘆無術黠金倘
原有之額金節以待不時之緩急似當仍存留
也至于八月司道二冊互異該道已經造報無

俟臣嘽嘽矣該臣謹會同總督張鳳翼巡按直隸監察御史張學周合詞上

請等因二月二十日奉

聖旨據奏孫元化以革冗汰浮補偏濟急陳新甲踵行其法非有侵隱但減原額以圖節省仍存空數以支實餉經制果否妥便并司道二冊互異等情該部科一併查核確議具奏欽此又該巡關監察御史張學周會題前事二月二十九日奉

聖旨已有旨了該部知道欽此欽遵通抄到部送司

又奉本部送據關外糧儲回部郎中王四聽呈
爲遵奉

明旨酌議清覈兵馬錢糧確數以釐弊蠹事內稱奉
本部堂劄付題覆本職

奏報八月分收放兵馬錢糧文冊緣繇奉

聖旨據查關外餉司所報兵馬錢糧文冊有與道冊
互異的是何緣故內實在支銀多寡數目與則例
不同還宜開註明白其謝尚政等援兵一營開薊
本折重支中間有無混冒經制之初法宜畫一通

著該鎮司道詳行查核報部察奏欽此欽遵創付
到職查得各營造支月餉悉遵經制則例凡遇
小盡之月馬步兵丁卽於則例應支數內俱截
扣銀六分米亦在內矣不扣米而總扣銀者因
升合難量不使支放之故開寧從來之成例也
其馬步兵丁俱扣六分免扣零銀便于作數者
案奉督師之憲行也又有本月新收而應支本
月截日之銀者又有前月開除而應扣前月截
日還官之銀者此皆則例中所減故實在支銀

之下合以食糧則例應支之數乃率有少支者
也正覆疏中所謂或小盡之內有扣米扣銀之
不一又或有截日扣除故縮於額之內者耳或
有上月新收乃於本月冊內補支上月截日之
銀者又有本月開除而應支本月截日之銀者
此皆則例外所加故實在支銀之下合以食糧
則例應支之數亦間有多支者也正覆疏中所
謂正支之外復有補支而爲數少浮者耳人援
官兵謝尚政一營關外所支月米六百七十八

石五斗是其應支者其在薊重支米折銀五百
四十一兩二錢應行薊鎮查追還官于職無涉
也至查道冊所報之數內有多于司冊者俱係
各驛隨營西援之兵馬寧前道因其原驛支領
月米故作實在之數開報耳本職爲其不支折
色餉乾而作開除之數減造者亦有叅對上月
之冊核其新收開除有不符合者卽爲減下是以
或多或少之不相合者此也總之本職放餉惟
以道號爲憑準而道號之中尤必細加磨算應

支者不得過爲裁減應減者必不謬爲虛冒等
因冊報到部奉批新餉司查議題覆奉此相應
核議具題案呈到部該臣等會同管理新餉右
侍郎周士樸查覈餉務戶科給事中許世璽看
得兵馬之消長不一錢糧之盈縮自殊惟是制
期畫一冊務詳明而所費于清之覈之者政在
消長盈縮間加之意耳年來兵多冒濫餉日虛
糜我

皇上慮積弊之難稽也設專官立月奏爲清兵核餉

計不啻周且密矣一時部科諸臣畏此

簡書朝承夕辦或頒冊式或發部單速置郵以傳

命頻羽檄而疊催該鎮司道當創法伊始急於奉行

不遑照會所報八月分兵馬錢糧文冊頗多互

異且有缺額復支又不明說緣故此科臣馬思

理所以有冒支之糾叅而臣等所以有駁查之

覆疏也今按遼撫回

奏與餉司所呈而覆覈之其道臣陳新甲標下兵

馬缺額仍支者踵前道孫元化已行之故事爲

補濟之實着通詳在案委非冒支者比業蒙

聖明洞鑒知非有侵隱矣但裁冗汰濫原爲節用倘
懸空數而支實餉雖云以標下之餘供標下之
之用然權宜於一時則爲補偏救急之着而踵
沿於日後將爲承訛襲舛之規且空馬乾銀業
經奉

旨裁革則此空數支餉之說恐非經制所宜原裁標
下官舍快役共四十員名并空役家丁百名糧
餉及空馬二百餘匹乾銀如果可省便當開除

傳龍必不可依違其節令天下有不可誣者
經制也及查數目參差彼此互異者則有因四
援調發而在遼在永之愆易有因收除小盡而
或找或截之難齊其招練等三管之多開馬五
十匹也司冊與道冊相符乃該管之漏造其寧
遠叅營之多開馬三匹也道冊與鎮冊相合乃
餉司因舊管不合改正開造而餉實未有多支
也至於高嶺站車夫二十一名車牛二十隻東
關站車夫十九名車牛十八隻杏山站車夫十

九名車牛十八隻其月米在驛支領而折色餉
餉乾又隨西援步右營造支故該道照原站造
報餉司照該營造報此二冊互異之繇其實支
餉止如其額而未嘗多發也若謝尚政入援宜
兵仍赴關鎮支米宜也乃復在薊鎮重支米折
銀五百四十一兩二錢是誠何心哉倘非臣部
查出濫觴何極所當仍令薊鎮查明果係何人
冒支卽行照數追補者也通查前項參差互異
請款原係關道未明原無情弊既經此番駁查

明白此後自當詳慎正其九十一月
節省等銀一千二百一十三兩九錢連前道
剩節省空乾等銀并七八月分節省等銀共一
千七百三十四兩三錢四分二項通共節省銀
二千九百四十八兩三錢四分米八十三石七
斗既從臣部餉中節出自當還供臣部之餉惟
是臣部先年曾借同金克餉同寺無以爲言今
道丁缺馬二百餘匹緩急何恃除米仍照例還
官外茲二千九百餘金之節省姑聽該撫道置

馬作正開銷亦臣部區區共濟之宜也既經遼撫巡關會題并餉司具呈前來相應覆

請恭候

命下臣移文各該衙門遵奉施行

崇禎四年三月初二日具

題本月初六日奉

聖旨錢糧最宜畫一道餉司發餉既以道號爲憑如何司道互異據奏欵項原明但前疏未詳開載經管官職掌何在縱無他弊疎玩奚辭念餉未失額

陳新甲王四聰姑從輕各罰俸三個月其兵馬缺額猶支實餉雖係補濟通融終非經制米仍照例還官前後節存現銀二千九百餘兩著該撫道留贖缺馬以後開除不得再給至謝尚政薊鎮重支米折確查經領何人如數追補該衙門知道欽此

覆議遼撫題請屯田責成事宜疏

題爲議復鹽法屯田以助衝邊事專理新餉山東
清吏司案呈崇禎四年二月二十一日奉本部
送戶科抄出遼東巡撫丘禾嘉題前事等因本
年二月十九日奉

聖旨戶部酌議速覆欽此又該薊遼總督張鳳翼題
同前事等因二月二十二日奉

聖旨已有旨了該部知道欽此又該直隸巡按御史
張學周題同前事二月二十八日奉

聖旨已有旨了該部知道欽此欽遵通抄到部送司
相應酌覆案呈到部該臣等看得遼鎮孤懸東
北地多沃壤自昔稱爲樂土自奴難起而兩河
之地盡染腥羶貔貅之衆率非衛卒屯田之廢
久矣目今所可屯者不過山海以至寧錦一帶
已耳惟是官兵錯處鴻鴈漸歸業無專屬賦法
不行一旦起而更之如欲歸之官屯則遼民失
望欲歸之民屯則兵士嗷嗷欲歸之兵屯則有
妨徵調調劑甚難紛囂易和是屯之一事誠未

易言也今據撫臣丘禾嘉與寧前道陳新甲酌
議前來臣部覆加覈定其說鑒鑒可行大都將
見在之地選委廉能職官履畝踏勘不拘官生
軍民照戶編查毋偏護豪右而求多窮窶分爲
上中下三則因地起租果係父祖故土墾種成
熟者照舊起科不爲限制如係流移開墾官兵
佔種者止許每名種地百畝俱令納租給與印
票收照其有荒蕪地方不拘兵民召募墾種三
年起科異時兵有不完扣抵月糧民有不完甲

首賠納務使兵士編氓肥瘠維均豪帥流離其
成擊壤較之徃時費屯本而化爲烏有收屯糧
而不作正餉者其得失省費實相萬也據稱寧
遠等三衛冊報計可得穀豆四萬石亦足爲遼
餉涓滴之助何憚而不爲乎但查撫道原議謂
每畝量收穀一斗四升豆八升各多寡不等臣
部謂穀須碾米米可卽以餉軍合照臣部題覆
薊永屯田之例上地每畝徵粟米一斗豆一斗
中地每畝徵粟米七升五合豆七升五合下地

每畝徵粟米五升豆五升但薊永猶有歲供額糧漕左則並額糧而無之是又輕於薊永矣今當立法之始不妨姑從輕省此後仍聽撫按酌議續增可也至於將領生儒承種田畝俱須一體起科不許阻撓想亦好義終事之念有必不容已者耳如抗違把持者從重究治目前責令三糧廳并管屯等官通行丈量督率墾種計畝徵收以充軍餉扣抵海運本色額數每年終將收過米豆造冊呈報司道轉報撫臣以徵收之

完欠定各官之殿最其疏奏

聞然後有田有租漸擴漸廣無事則未相相望有事則戈矛相接裕餉恢遼不難矣此誠經久之宏謨而今日所宜早計者也既經該撫會同總督及巡關御史會題前來相應覆

請恭候

命下臣部移文閣部并薊遼總督遼東巡撫及巡關御史一體遵奉施行

崇禎四年三月初四具

題本月初六日奉

聖旨這遼左屯田事宜依議責成該管官文明督銀
起科充餉如有占阻逋負罪坐所繇爾部向苦餽
運凡地方有生節錢糧俱要登奏明日彼抵此銷
毋得重叠開除首滋虛冒欽此

議覆城外列管京軍犒賞銀兩疏

題爲查敘有勞各官以昭激勸事專理新餉山東
清吏司案呈崇禎四年二月十一日奉本部送
戶科抄出兵部尚書梁廷棟題前事議將城外
列管兵八千與垛軍八萬八千餘名同賞人各
五錢共應賞銀四萬八千餘兩或頒

內帑或支戶部聽戎政衙門擡領給散等因本年
四月初七日奉

聖旨這城外列管兵八千併守垛的旣効有勤勞每

名給賞銀五錢務令沾惠其賞功銀兩應否給
戶部還速行合議具奏欽此欽遵抄出到部送司
又奉本部送准兵部咨同前事內開煩爲遵照
明旨內事理卽將京營軍賞銀兩應於何項動支給
發酌妥咨會以憑合奏等因到部送司相應酌
議具題案呈到部該臣等看得登埤軍士當威
發栗烈之時効捍外衛內之力列營官軍值磨
騎戕掠之際張堅壁禦侮之威其勞其苦均不
容泯每名各給賞銀五錢誠犒功之盛典所當

速爲措給以昭

至仁者也但賞功銀兩舊例多出同寺此原疏有或
頒

內帑或支戶部爲兩

之說非專責之詞也續奉

旨應否給自戶部蓋已

鑒臣部之匱乏而爲之慮矣謹遵合議具奏之

旨臣部隨與兵部商之回稱認發三萬兩其餘一萬
八千兩欲令臣部奏發可謂曲爲體諒而不過

於責望者矣臣部誼在相成又何敢以膜外視
之惟是近日以來外解甚稀而計吏初旋徵輸
中斷方苦目前月餉之不敷焉有餘力以供分
外之求乎卽前次兵部具題令臣部發關寧賞
功銀三萬兩尚在搜括未能成行而可又重以
京營之犒賞乎雖兵部已認三萬兩尚存一萬
八千兩亦恐臣部未易辦也無已則有一焉查
去年八月該戎政府襄城伯李守鐫

奏繳城中錢糧有餘剩駙馬冉興讓并御史李

等捐助銀一萬四千七百三十一兩三錢二分
九釐奉有留貯京管作正支銷之

旨又於十二月內續繳鹽菜餘剩銀九千零四兩四
分七釐八毫奉有解交戶部另貯候旨支發之
旨茲二項者原皆

皇上留之以待不時之需者也合無卽將戶部收貯
餘剩鹽菜銀九千餘兩再於京管存貯捐助銀
一萬四千餘兩內動支九千兩共湊一萬八千
兩之數并兵部三萬兩貴令戎政衙門擡領給

散究日徑自 奏繳盡戶部發關寧賞功之三
萬兵部發京管犒賞之三萬數適相當其餘不
敷卽以城守之美餘供城守之功犒臣部無設
處之煩軍士受挾纘之惠正

皇上所謂作正支銷者也臣等未敢擅便理合題
請恭候

命下臣部移文戎政衙門一體遵奉施行

崇禎四年三月初五日具 題初八日奉

聖旨依議欽此

議抵閩省援兵支過安家行糧

題爲報解援兵本等月糧以備接支事專理新餉
山東清吏司案呈崇禎四年正月二十三日奉
本部送戶科抄出福建巡撫熊文燦題前事等
因本年正月二十一日奉

聖旨這續解該省援兵月餉到日照數查收其支過
安家衣甲并行糧襍費銀兩作何扣抵著戶兵工
三部確酌定議速奏該衙門知道欽此欽遵抄出
到部送司具覆間又奉本部送准兵部咨同前

事內開查閩省驛站並無加增無可留抵且原額所裁站銀本部亟需買馬難以議留其該省援兵安家已經用過貴部新餉銀兩相應准與開銷等因又准工部咨同前事二月初六日奉聖旨這福建援兵衣甲之費還照楚浙例著該省撫按設法抵補不得輕動料價該衙門知道欽此欽遵移咨到部送司除起解援兵月餉俟解到查收其衣甲銀兩已經工部具覆外所有安家行糧二項相應酌覆奏呈到部該臣等看得閩省

當援兵入衛之時曾用行月糧銀及僱船賞賚等項共銀三萬五千八百五十八兩三錢內該本等月糧一萬一千七百九十六兩一錢六分五釐應動本省兵餉其行糧及諸費二萬四千六十二兩一錢二分五釐動支臣部天啓七年分禱派銀兩此項款分明而臣部所當分認者也至於用過安家銀一萬一千七十一兩自應屬之兵部初雖兵部原議已令該省將三年分驛站免加銀兩姑留一年以應援兵之用是業

已承認矣頃據撫臣熊文煊稱臣部崇禎三年裁省驛站銀兩原無加增無可留抵統於三年裁省驛通銀內撥出一萬一千七十一兩抵補安家似屬正論今兵部以買馬之故不允其請惟欲於新餉內開銷臣部展轉籌維雖無贏餘以爲舍已之耘第閩方用兵旣難責以設處若彼此推諉則任事者掣肘合無姑聽該撫於臣部崇禎三年分生員優免銀內銷算以完不了之局可也至於驛通銀兩則解兵部充馬價賦役銀兩

亦解臣部充舊餉各濟急需無相混淆既經聞
撫具題前來相應覆

請恭候

命下臣部移文該省巡撫并各都察院轉行巡按御
史遵奉施行

崇禎四年三月初五日具

題本月初八日奉

聖旨依議欽此

議罰侵犯王昌案內經管餉司疏

題爲軍需萬分缺乏軍儲千方耗蠹謹據實查叅
仰祈

聖鑒事專理新餉山東清吏司案呈崇禎四年二
月初六日奉本部送戶科抄出本部題前事等因
本年二月初三日奉

聖旨王建侯閻顧行職司餉務漫無稽防以致千萬
軍儲盡飽奸貪僅擬罰俸何足示懲著另議來王
昌等情罪刑部確擬具奏原贓立限嚴追充餉該

衙門知道欽此欽遵抄出到部送司查議間續奉
本部送戶科抄出兵部職方清吏司主事王建
侯奏爲微臣職掌有據蒙罪無辜謹按實歷誠
以祈

聖鑒事本年二月十七日奉

聖旨這本內事情該部查明具奏欽此欽遵通抄到
部送司案呈到部該臣等看得各鎮司餉一差
本折兼理至關寧而稍異矣折色歲以百萬計
惟餉司一人綜覈出入而本色之收支勢不能

兼隨設有海運陸運二廳爲之分任年來相沿
以爲成例餉司但發一單而支放之事不與焉
臣前疏已詳言之而仍擬罰於餉司二臣者蓋
亦仰體

皇上責成之重而不敢少爲寬假者也恭繹

明旨以二臣職司餉務責其漫無稽防因名核實凜
若 斧鉞臣方欲另爲擬議而原任餉司王建
侯以職掌有據蒙罪無辜仰乞

聖鑒一疏又奉

明旨下部查事情具奏矣臣細查往案詳稽原情
二餉司事亦自有不同者查王建侯司餉之年
其時爲海運廳者張珍也張珍以府官而兼部
銜有相關之名而無相轄之體維時本色出入
總張珍爲政建侯已洞鑒其情弊不可收拾因
具有本色收放情形一詳又有申明職掌一詳
申請督師衙門乞行駁查不料督臣王之臣以
餉司只司支收原無稽覈道旣掛號有無虛冒
道任其責批詳歷歷可據是建侯自伸其職掌

銳意稽核而無如勢格不行何也至又申詳臣部前任尚書郭允厚雖行申飭未經題

請夫既不操稽覈之權而責以稽覈不惟事嫌越俎亦且勢多掣肘則建侯疏中所言事爲實事情爲真情無容再議者也錢穀所在弊蠹殊多建侯旣聲說於天啓七年之冬嗣後大家不能搜剔以致敗露於崇禎二年之春相去二載亦庶幾無媿職掌則臣前擬罰俸一年似原屬責備而不敢曲徇於其間矣及查當日發覺各委奸

弊則樞臣果廷棟整飭關內時也彼時運廳則有已故之黃登雲處分之趙宋儒而當其事者則餉司閻顧行也彼時雖亦循習舊例分理本折不得自繇然事前而寂無言事後而始置辯職掌安在查此案不結者已閱三年臣行關內道臣詳查經管何官分別議處而該道以二臣職名開報是以一槩擬罰今就二臣事情互相衡量若王建侯情屬可原而法當少寬應仍罰俸一年若閻顧行終難解免今見任黃州府

府似當降職一級照舊管事以示懲創者也臣
於是而更有感焉關寧歲需本色幾以百五十
萬計粒粒皆百姓膏血轉輸惟艱乃竟徒飽奸
貪之腹恣其侵冒而莫可誰何非賴樞臣梁廷
棟燃犀坐照赤心剔釐又江海之漏卮又安能
杜塞於將來乎大臣公忠體國自應仰荷

聖鑒特賜優異臣未敢贅至於磨勘銷算任怨發奸
則通判郭萬程爲政遵照前旨移會似當紀
錄姑俟病痊起用不可遂令泯泯無聞已也總

以錢糧至重臣謹據實劄晰分別降罰紀錄
前慈後伏乞

勅下臣部移咨吏部一體遵奉施行

崇禎四年三月初五日具題本月初八日奉

聖旨關寧軍餉本色雖運廳分任然總單發自餉司
豈得全無稽察閭顧行治郡被劾已着吏部一併
議處王建侯既有屢詳可據姑罰俸一年張珍具
任何官還查明奏來郭萬程准與紀敘該部知道
欽此

覆黔兵補食關餉貼防暫支鹽菜疏

題爲一餉不能兩顧敬申末議兼再計水營以求
實用事專理新餉山東清吏司案呈崇禎四年
二月十三日奉本部送戶科抄出本部題覆前
事等因二月十一日奉

聖旨這酌議登遼調補兵餉卽移會該撫各造清冊
以便支給銷算不得彼此推溷黔兵補食關寧月
餉旣經題覆奉旨如何丘禾嘉又稱部議不定分
文未支其中有無別情著該道餉司明白奏來欽

此欽遵抄出到部送司行聞二月十四日奉
部送據寧前道兵備陳新甲呈蒙戶部劄付前
事內稱查得黔兵萬里入衛調防冷口自崇禎
三年六月初一日起止給鹽粟蒙遼東巡撫兵
禾嘉於十月初二日題議裁汰關內車步陸營
每營一百二十名併登撫帶去彭應明步中營
七百一十名內撥五百名共計一千二百一十
名之餉餉黔兵以黃龍帶去步左營一千四百
名并登撫帶去步中營七百一十名內撥出

百名共計一千五百名之餉餉王弘化島兵業
蒙本部議准通融于本年九月內案行開永餉
司矣文移往返耽延撥補未確故十一月內順
天巡撫劉可訓又爲咨請又蒙本部劄行開寧
餉司以停止鹽菜之日准支月餉矣正遵行間
又于本月十一日蒙本部咨遼東巡撫丘禾嘉
爲申明兵馬錢糧數目速懇撥發事調遼兵移
遼餉緣繇蒙部覆有云至于貼防冷口黔兵一
千二百二十四員名據裒關內之空額以抵補

似屬簡便但湊補寧遠步中營五百名之數是
卽以王弘化頂補黃龍之意仍應總聽閣部會
同二撫酌妥等語所以遼撫丘禾嘉又議將步
中營七百餘名之餉補步左盡歸登撫而黔兵
之餉盡以關內車步陸營缺額給之疏內所謂
部議未定者此也黔管亦因議論未定未行關
支從無冊領赴關外掛號故許鎮揭中有七月
初一日起至十一月終止俱無影響若待貴州
補解終是盡餉等語遼撫丘禾嘉疏中所謂分

文未給者此也爲今所謂業蒙遼撫丘禾嘉牌
行關內道移會許鎮從崇禎四年正月爲始將
車步陸營缺額撥給黔兵矣至於歷過六箇月
或本部念其孤踪遠戍設法通融如謂外解不
至聽黔餉補給是在台裁原奉本部劄付會同
關內司道徑自具奏但關內外各有職掌以四
臣而共一疏恐不便措詞伏乞本部查明具奏
以省微臣唐突之罪等因又據山海餉司主事
林玄呈爲亟請撥發黔兵補食關餉以應急需

事竊照關門兵餉蒙本部每月祇發四萬三千
三百兩而缺額餉銀俱蒙截發遇有撤回募補
尚苦支放不足茲准署關內道事管關陳郎中
手本會稱爲懇憐萬里入援比照關遼兵例當
給鹽菜以資戰守事准永平方副使手本蒙閣
部孫承宗批據入衛貴州總兵許成名呈詳前
事爲照貴州入衛官兵奉

旨貼防冷口自六月以至今始枵腹冒暑繼凍餒難
堪屢奉

明旨將黔兵填補關寧缺伍向來議論未定竟不敢糊塗請支今議見月文到之日在於寧鎮起支則自七月初一日起至十一月終止俱無影響矣若待貴州解補終是畫餅似此邊塞千餘餓口難禁嗷嗷俯賜頒行則例便於依式攢造在於某道覈支等因蒙批萬里入援半年守戍豈得置役過之糧而不問永平道卽同該司兌給現月仍補給舊欠以恤遠兵蒙此備會到司該本職查得黔兵補食關寧缺餉部議固已久定

該營未經造冊赴支今蒙本部創准黔兵一千二百員名始自崇禎三年十月初一日起支至今年二月共五箇月每月約該原餉銀一千七百五十餘兩共該銀八千七百餘兩尚有從前役過七月至九月共三箇月又該銀五千二百餘兩蒙閣部批允兌給現月仍補給舊欠通計該發黔兵應領舊欠現月之銀共一萬三千九百餘兩但本部向無缺額之餉發解來關並無餘銀存貯本職將何術以應黔兵前後餉之請

也兼龍武中營業蒙部創已于八月截支復歸
關外領餉又經遼東巡撫批令龍武中營在關
守凍且方奉

明旨錢糧未一合于關內一體支給總之難分彼此
也已經准照道號餉冊自八月起至十二月共
放過餉銀共一萬三百四十兩九錢七分六釐
八毫此皆月發餉額數內所未及計算亦係本
職千方那給合無呈請俯賜一併照數撥補等
因到部又據山海兵備今聽調王楫呈蒙戶部

割付前事爲照黔兵糧餉以車步營以缺額給
成議可遵本道曷敢推諉俟有冊領投到卽當
分關兵之餉以慰遠戍但該鎮移文稱不諳邊
例難以造冊竟無一委官赴道支領者則耽延
非本道之罪亦與餉司無涉也今蒙行查合將
詳會情繇備述具呈等因又據關外餉司郎中
雷一鳳呈奉本部堂割付前事隨該本職會查
關內司道并寧前道去後隨准署關內道事陳
郎中手本內稱未准本職移會之先該前道王

副使蒙本部劄付前事業該王副使備將黔兵
補食關寧并黔鎮不赴支領饑兵自縊各緣繇
具呈戶部去後今准前因正擬覆間准山海餉
司林玄揭帖內稱奉本部劄付該職備行移會
關內道今調簡王副使查取黔兵餉冊去後隨
准手本回稱屢將黔兵補食關寧月糧通詳閣
部撫院業已批允補食車步缺額之餉備會貴
州入衛總兵官許成名造冊掛支至十一月二
十四日准許鎮守覆稱本鎮南將不諳邊例俟

請式到日自當造冊請覈遲延至今未見投到
冊領何從掛號會送補給等因到職該職竊照
皇上軫恤邊士况黔兵萬里入援既經本部劄付補
食關內車步陸營缺兵之額卽關庫原無縮儲
職斷無敢不通融措給而坐視其枵腹荷戈也
但黔將並無差官赴關內道投冊掛號而該道
卽無餉冊會送過職該管戍冷口離開二百里
職正猜其不來原非來而不應則黔兵饑窘自
縊委非職餉司之罪明矣今復再移轉趣俟到

卽應決不敢遷延時日以稽

皇上德意等因除具奏外理合具揭等因到道准此
爲照黔兵月餉遷延未給亦以該鎮原無報有
冊領業經山海餉司林郎中奏明外俟黔兵餉
冊到日卽當立刻掛發以愾饑軍等因准此看
得本職給餉全憑道號而各管更調一聽督撫
至於酌盈濟虛裒益寡非本職所當擅專者
及查三年九月間前任王郎中蒙本部劄付令
以關寧缺額之糧補給黔兵月餉遵照在案但

餉司按月給餉止據道發號冊爲則而從奉劄
後並未見有黔兵支領月餉之號冊又並未見
有關外某營之缺額扣給黔兵之會案則本職
將何憑而扣何憑而給乎耽延踰期之罪實於
本職毫無涉也今奉本部劄付嚴查今會同關
內司道竟自具奏本職敢不仰遵但關內外司
道各有職掌不敢遽爲陳瀆況旣經林郎中據
實奏明則職曷敢自干唐突伏乞電鑒顛末一
併查明奏覆等因到部奉批此事關內外司道

公移俱至新餉司作速具題俱送到司相應一併具題案呈到部該臣等看得黔省官兵一千二百一十員名萬里入援六月初旬隨卽調防冷口其每月鹽菜俱在永鎮支給未嘗缺也逮至十月初旬而遼撫丘禾嘉始有改抵關寧主兵之議臣部旋經覆

允妄意業已出關當停鹽菜而支月餉不謂貼防冷口如故支領鹽菜如故而又欲兼支關寧之餉也臣部原行自十月

命下日爲始准給月餉而縣中兵將又欲從七月起
再補三月垂涎覬覦往返請詳以故日久而不
決也夫黔餉每月不過九錢而關餉每月則一
兩八錢矣黔兵初至給有安家已爲優厚他省
所無則今茲找補關餉似不必以初至之日爲
始也夫旣支鹽菜九錢行糧四斗五升又支月
餉一兩八錢則溢於三兩之外矣卽如川兵之
在遵化者每月月餉不過一兩五錢猶待給於
該省臣部特爲借貸耳夫且靳於已成功之川

兵而可施於未見敵之黔兵乎所當遵照成議
自十月初一日起照例補食關寧車步缺額之
餉姑以貼防冷口兼支鹽菜仍俟回關之日卽
行停給者也惟是計兵授食司餉者任之造冊
關支將兵者任之故疾呼不應責在餉司而俛
首待斃咎將誰諉黔兵月餉補食關寧業奉

欽依通行許久尚爾枵腹自縊臣初聞之深恐餉司
之調劑未當也今據各司道所呈咸稱通詳閣
撫批允給餉備會該鎮總兵許成名造冊掛支

而該鎮回稱南將不諳邊例必俟請式而後
冊文移往返致費時日所爭蓋在補支多寡之
間則彼嗷嗷枵腹之苦實亦自貽伊戚耳此
將之責而非司道之過也况黔兵仍懷思歸
意似尚不安於關寧者而可徒糜厚餉漫無
制已哉既經各司道具呈前來相應代題奉
命下臣部移文各該衙門遵奉施行

崇禎四年三月初五日具

題本月初八日奉

聖旨黔兵月餉補食關寧依議自十月初一爲始其
鹽菜銀姑以貼防兼支俟回關日停給前林玄疏
稱車步營缺兵額餉該部已經扣截還著查明措
補欽此

覆袁御史條陳江西加派照額備募疏

題爲民瘼可軫

聖慮甚周乞

勅定攻守萬全之略信加派停止之期以固根本
弭釁孽事專理新餉山東清吏司案呈崇禎四
年正月二十五日奉本部送戶科抄出廣東道
試監察御史袁繼咸題前事等因本年正月二
十三日奉

聖旨加派原非得已屢旨甚明兵旣難散餉復不貲

與其多立名色巧爲搜求不若照田起科猶恐
間灼知定數不受貪吏奸胥朘削且科旣隨田
多寡法惟裒富原不累貧幾經廷議方始頒行
養愛元元朕與諸臣誰無此心何獨爾等二三
進官諂曉大義顯是借題鼓煽市德徼名如
有裕國惠民長計實着何不明白陳奏至責備
邊督撫不能精兵減餉以寬民力說得是其江
西偏累事情戶部查酌議覆欽此欽遵抄出到部
送司相應議覆案呈到部該臣等看得字內之苦

加派也

皇上念之臣部與

廷臣亦共念之乃因寇迫門庭不得不增兵以圖
恢復勦兵既增添不得不加派以資飽騰此固

聖明之所洞鑒亦四海臣民之所共諒者也但據臺
臣所陳江西偏累之苦則誠不可不爲之審處
者查臣部前議加派疏內雖云每畝三釐然亦
恐地方疆域各別輕重失宜曾云照糧照畝各
從地方之便不謂江西一省有田二百畝爲一

石有三四十畝爲一石又有五畝八分爲一石
論畝則畝多者畸重論糧則畝少者畸重如臺
臣欲照徵銀則酌量加派省以此派于府府以
此派于縣務如部額而止此以地方之人談地
方之事與局外揣摩臆度者自是不同但江西
徵銀之額未知若何準則恐亦不出畝數糧石
之外多寡肥瘠難以懸定合行該撫按從長酌
議必期加派無輕重之差編氓有維均之慶不
臣條議之苦心可也旣經具題前來相應

覆

請恭候

命下臣部行文江西巡撫并都察院轉行江西巡按

御史酌議回

奏施行

崇禎四年三月初七日具

題本月初十日奉

聖旨江西加派事宜著該撫按酌議具奏欽此

議覆黔中四年題留楚餉疏

題爲酌請四年新餉以祈接濟事專理新餉山東
清吏司案呈崇禎四年二月二十三日奉本部
送戶科抄出四川總督朱燮元題前事等因本
年二月二十日奉

聖旨該部酌議速覆欽此欽遵抄出到部送司相應
議覆間案呈到部該臣等看得逆孽就撫黔局
漸結然修防一日未固則三萬之旅未可一日
議撤也川貴督臣就兵給餉欲割湖南湖北八

府州縣加派雜項共以二十七萬七千兩零
充黔餉亦可謂極其節省者矣臣何敢復議分
其有餘者以餉東援之師乎查黔鹽原議今年
停止前督臣以爲可行或者再令巡鹽御史照
數徵解臣部以供軍需至於廣西原有協濟援
黔之例遂將該省梧兵銀二萬兩分以餉黔本
部又分三年襍項銀八千兩以補不足此皆臣
部新餉內分給之數也不料兩處支吾終年
鮮殊可詫異所當速行督臣查其元二三年共

解若干未解若干除解黔者准其開銷如未完者照數解部稍有遲延繩以叅罰夫黔以積疲之地事事仰給他省若援兵之餉而責以供應徒滋畫餅誠如督臣之議但黔中援兵一千二百餘名前以遼撫之請留抵關寧主兵一切行月本折俱從臣部給發蓋不俟督臣之疏至而已蚤有成說矣似無容再議也伏乞

勅下該省撫按衙門黔中兵餉除楚蜀協濟額派七萬四千餘兩外仍將楚中新餉二十七萬七千

餘兩零照府分割有司徵解不得仍前支吾如
因別項動支及先經解京者務須如數補足遺
下黔鹽西粵銀兩設法催解歸還臣部毋得拖
延其有佐於軍興匪淺鮮矣既經督臣具題前
來相應覆

請恭候

命下臣部移文該省總督并撫按遵奉施行

崇禎四年三月初七日具

題本月初十日奉

聖旨依議但入援黔兵補食關寧缺餉該部昨疏以
十月爲始今該省旣難責以供應則七八九月作
何抵給還着詳議具奏欽此

回奏劄發押銀往秦選鋒行糧日期疏

題爲遵

旨回奏仰祈

聖鑒事本月初七日該戶科抄出錦衣衛題爲遵奉
聖諭事初六日奉

聖旨婁應麟等給發軍糧需索使費雖經吐認尚未
盡供還者再行研鞫具奏招內所稱餉司不肯速
發是何緣故着戶部堂上官查明奏來欽此欽遵
除婁應麟等情事再聽該衛研審具奏外該臣

等查得選鋒行糧一節兵部咨文係二月初四日投部臣以各丁押銀往秦勢不可緩當批新餉司查議給發此二月初四日晚間事也該司官郎中降二級管事薛邦瑞恐多寡難定未敢臆決次蚤將來咨請臣親裁臣隨批道途雖遠不過三千去時四十五日回時一月不啻足矣每日給鹽菜三分米一升五合折銀一分二釐馬料草每日折銀四分該司遵奉臣批卽於初五日晚具稿呈堂隨於初六日蚤劄發新餉庫

給銀三百七兩五錢該庫亦卽於初七日給發
可謂速矣而該管司總于起化乃謂餉司不肯
速發夫應發之銀無論餉司不敢遲緩卽臣亦
不肯聽其遲緩此事文到卽批批後卽行又原
咨三月止給兩月有半亦繇臣親定嗣後風聞
使用之語該司官卽將書役妻應麟先行拘送
解臣重責羈監以俟查明叅送亦可謂發摘奸
猾不致輕縱者矣臣前有疏已經備悉入

告業蒙

皇上洞鑒總之奸書需索莫可方物明借遲速之說
以遂驕鴈之謀該司官當日說堂行文劄發俱
極迅速而實未之遲也臣等奉有查明具奏之
旨相應遵

旨回奏仰祈

聖明鑒察施行臣等曷勝悚息待

命之至

崇禎四年三月初八日具

題本月十二日奉

聖旨據奏給發選鋒行糧該司官未有遲延知道了
薛邦瑞等姑不究以後收放錢糧俱要刻期竣事
曉示明悉出入公平勿令猾胥借端需勒叢滋奸
弊端者一體治罪該部速行嚴飭欽此

題覆發過黔兵月餉疏

題爲軍務事專理新餉山東清吏司案呈崇禎四年三月初二日奉本部送戶科抄出兵部尚書梁廷棟題前事等因本年二月三十日奉

聖旨這王新民所招兵旣經點驗依議暫赴鄧玘全營團練但兵易增餉難繼畢竟補何缺曠方爲長便還與該督撫酌議具奏所請量復冠帶著該部將被叅削籍情繇查明奏奪欽此欽遵本月初五日又准兵部咨爲懇憐天末遠兵照例俯給稿

賞行糧以昭激勸事據原任兵部武選司郎中
今削籍王新民呈前事等因到部看得王新民
捐資招募跋涉遠來已於二月十四日抵京住
扎

阜城門外今該本部調發薊鎮所需行糧相應咨
會希將貴州王新民義兵一千三百五十九名
行糧照例速給以憑促發等因移咨到部奉批
司查准以文到日爲始先給行糧米五日再議
折色又准兵部咨亦爲軍務事據貴州統兵參

將牟文綬呈稱本營官兵於二月十二日到京
蒙賞谷自二月十二日起至四月十二日止兩
月餉銀已蒙給發一月卑職奉令前往西協在
於初三日起行但官兵新到彼處凡賃店及應
用什物等項俱賴月餉且一到數日卽滿三月
十一領餉之期懇將原谷內未發一月之餉并
自二月十二日起至四月十二日止兩月塩菜
銀兩一併賞谷給發等因到部據此合咨貴部
煩將貴州叅將牟文綬所統官兵二千一百四

十二員名所請預那糧餉查照速給等因移奉
到部奉批新餉司查又據貴州布政司叅政全
監理河曲南兵事務監軍道周鴻圖呈稱本道
遵督陸續選中官兵二千七百七十二員名於
本年二月十二日到京十五日奉兵部三堂親
詣彰義門外逐名閱視卽於本月十二日開餉
所有總督部院原發餉銀二萬兩俱以各兵起
行之日開支至到京日止本道會同叅將牟文
綬共給過銀一萬七千四百六十三兩四錢九

分取具各官兵領狀在卷尚剩存銀二千五百
三十六兩五錢一分該本道將餘餉分發一千
零四十四兩七錢給守備趙民懷收貯以作本
道親兵下次應支一月糧餉分發一千四百九
十一兩八錢一分給叅將牟文綬收貯候本官
下次支餉照數扣坐爲此今將前繇並餉冊一
本理合呈報等因到部奉批新餉司美明具題
作正支銷仍行文兵部及山西知會通送到司
奉此查得貴州監軍道叅政周鴻圖領親兵六

百三十員名馬十六匹叅將牟文綬領官兵二千一百四十二員名馬六十七匹俱于二月十二日到京其官兵應支口糧米每日共該四十一石五斗八升俱自十二日到京爲始按日支至本月三十日止矣續准兵部咨會於二月二十九等日劄發過周叅政官兵月餉銀三個月共銀三千一百三十四兩一錢又給塩菜一月計銀六百零三兩九錢以爲赴防河曲之需其牟文綬所統官兵比時尚未啓行於口糧外止

先給月餉一月計銀三千四百一十九兩三錢
至於王新民義兵一千三百五十九名本月初
五日兵部移咨到部業奉堂批以文到日爲始
先給行糧五日共給過米一百零一石九斗二
升五合今奉文綬以赴防西協又欲預那月餉
一月并討二月十二日起至四月十二日止塩
菜銀兩併王新民糧餉規則相應從長酌定具
題以便支給案呈到部該臣等看得兵貴有用
之兵餉期可繼之餉倘不審時勢緩急漫無限

制一槩濫支是以萬姓之脂膏輕擲爲泥沙之用也

明旨所云兵易增餉難繼者蓋洞照及此矣矧今奴氛喙息非有寇逼門庭之急也河上逍遙非有鋒鏑死亡之危也臣部每念金錢有限中竭堪虞嘗欲於援兵塩菜一項量有停節以紓財力於萬一第念坐食已久驟裁爲難又援兵有仍食本地餉者其餉原薄又且不以時至以故躊躇而未敢議至於續到援兵慮始宜慎行月兼

支糜費可惜又豈可漫無調劑之宜而致成糜
底之勢也如周鴻圖卒文綬王新民兵丁與秦
翼明兵丁均係川貴入衛之旅秦翼明所統
半四川土兵在彼原無月餉周鴻圖卒文綬所
統雖係貴州官兵而黔省力不能供則月餉亦
臣部事矣若王新民名爲義兵又係新募而來
原無月餉者也秦兵原題照遼兵例每名支月
餉銀一兩八錢米在其內並未支給塩菜業奉
俞旨允行今周鴻圖卒文綬王新民之兵復後秦兵

而至夫豈有異焉似宜以募兵支餉之例爲準而稍加衷益以歸於至當周鴻圖所領親兵前赴晉中勦捕流寇臣部議給月餉一兩五錢米亦在內而塩菜每日三分之數臣部止給一月其餘聽於晉中給發似已從優厚矣牟文綬兵發詣密鎮援防似當查照秦兵之例連米止支一兩八錢而塩菜之奢求萬難允從者也今周鴻圖官兵六百三十員名馬十六匹除口糧外業經發過月餉三箇月共銀三千一百三十四

兩一錢自二月十二日起支至五月十二日止
矣又領塩菜銀六百零三兩九錢聽作一月行
糧之需至於該道所給帶來餘餉一千四十四
兩七錢并應算作下月餉銀者也平文綬官兵
二千一百四十員名馬六十七匹除口糧外先
經發過月餉一月計銀三千一百四十九兩三
錢自二月十二日起支至三月十二日止矣今
准兵部咨請再發一月而所領該道餘餉一千
四百九十一兩八錢一分卽當於此通融找算

者也王新民兵不係調發而係召募

明旨原謂畢竟補何缺曠方爲長便臣等竊意薊鎮三協新兵三萬尚未召足不若卽以此兵一千三百五十九名補之可充實伍而免虛糜所食月餉當照薊州新兵之例每月一兩五錢米亦在內不給塩菜但其開闕初至除給過口糧十五日外亦宜量給一兩八錢一月以示優恤下月不得援以爲例者也查天啓元二年間徵調邊兵抵開寧者俱支月糧而無行糧崇禎二年

之各虜氛孔熾各處援兵率多裹糧而來止支行糧惟開寧及團練營之兵曲加鼓舞以資敵愾遂不免行月兼支矣後各省直兵餉接濟不前多向臣部借貸借而不還又不免行月兼支矣目今虜倣少息錢糧匱甚計不得不稍爲更張况有泰兵新定之則例在又何敢作法於蒼而不預爲酌議也又此外赴援應募之兵徃徃濫設將領虛糜廩餉姑俟前至薊密之日仍令督撫再一點查可裁則裁無令耗費無已時也

既經兵部具題并監軍道具呈前來相應題

請恭候

命下臣部移文各該衙門遵本施行

崇禎四年三月初十日具

題本月十三日奉

聖旨這王新民周鴻圖年文綬各兵月餉知道了俱依議行薊鎮新募土著曾否足數其王新民兵是否堪補着兵部酌議具奏欽此

覆登撫孫元化議改島餉運道疏

題爲議改運道以裕儲省費事專埋新餉山東清
吏司案呈崇禎四年二月初六日恭蒙

御前發下紅本該登萊巡撫孫元化題前事等因奉
聖旨島糧解運風滋解委蠹數積弊可恨據奏三年
分島糧餉司餉道已報運過十五萬餘乃實收不
過八萬侵沒幾半法紀何存此係何人領運何時
驗發其中必有營求批委通同耗匿等情著該撫
司道一一明白具奏孫元化身任封疆正當實心

釐覈力任勞怨如以後再有經管模糊運委姦欺情弊卽據實指叅勿得容隱萬曆四十八年未有島兵安從島運前部䟽從淮運島之說是何所據本內米價貴賤及敝舟爛糧種種事情都與部議有舛卽着該部再行詳酌明確說來該衙門知道欽此欽遵到部送司案呈到部該臣等看得本色爲遼島急需海運尤轉輸大政登撫志切吞胡才堪縮地議將應用島餉徵派江北從淮下海運島交卸其登萊召買一項繫從寬減不任

爲東省造命卽津部亦可省飛輓之煩且所言
海勢轉折道里遠近米價高低較若列眉無非
從軍 國起見臣獨何心顧不相諒相成而敢
有異同哉簡查萬曆四十八年之議創自前任
天津督餉侍郎李長庚因遼事初起所需本色
數多山東運至六十萬天津運至六十九萬猶
稱不敷議於淮上雇造淮沙二船運米三十萬
石維時漕撫王紀以爲不便歷引萬曆二十年
倭犯朝鮮戶部議用遮船海運該漕儲道沈修

議有五難隨支運臨德倉糧繇河運津募船運
遼又萬曆二十三年總督邢玠議用遮船海運
該漕儲道白希繻執稱不便呈詳漕撫褚鈇具
題繇河運津轉運在卷逮於四十八年再申前
議初意亦令淮徐道兼管後以路遙緒紛兼攝
爲難又議添設海運兵備道卽以岳駿聲爲之
截漕轉運過成山拖東設嚮導爲接引不謂行
至鶯遊山遭風原幫米七萬二千一百餘石其
漂損者以四萬石計而運至蓋套者不過八千

二百餘石耳其餘交登州者二萬二千七百餘石掣回繇內河運津者一千五百餘石而淮上海運之議寢矣此固昔年之已事也今登撫斷在必行應不蹈前人覆轍臣部亦不得不行拈出以備後日之參驗至添官之議登撫語意或有抑揚但恐該道又以馬腹不及爲言臣是以有添官增費之過慮是則臣之愚也若夫大海茫茫風波爲祟無論津運登運淮運均有漂沒之患但有甚與不甚所謂擇害莫若輕者也而

奸宄窟穴尤爲可恨其害不在颶礁之下所賴
地方官擇人委任仍按數查覈俾不致爲耗蠹
之所乘耳若就中奸弊卽臣部可以與聞而顧
能代爲經管諸臣分過乎又云繇津運寧漂沒
十一繇津運島漂沒十二繇登運島漂沒十之
三四此自典守之責至登運愈近而漂沒愈多
尤不可解此正登撫所當問者若繇淮運島更
屬大洋豈便可料其百無一失耶登撫又謂登
萊米價近日騰湧此自憫念地方重軫時艱

德意緣登萊去秋風潦爲災曾經登撫沈珣

奏報近日米價迥異往時部議七錢七分定自前
官原較數歲之中以爲常也今日適值其窮自
當量爲增益要難重困此一方民矣但登斗較
准斗頗大則市斗斛斗又當折算合論而未可
膠勢也登撫又謂專設廳官於淮先集民船隨
到隨收勿使等候是矣臣愚又恐此等民船號
爲外水專以漂洋爲利若謂獨無漂失可免侵
費又臣愚所不敢逆料者也總之登撫具通方

達變之才微臣局蹈常襲故之見管窺蠡測委
不足佐登撫下風耳至繇淮運遼則成山芙蓉
等島皆船糧必經之地該司官下筆未詳遂誤
以運遼爲運島致煩登撫駁問

明旨詰察此則司官偶踈微臣失簡無所辭於鹵莽
之罪者也他如帶運原有加耗召買更係重價
不知何故乃有爛糧裝運原領水脚經管又有
專責不知何故乃用敝舟臣部委不能身履其
地一一綜覈所幸登撫任勞任怨振刷方新則

坐運總運船戶等項員役自當徹底窮究盡改
絃轍用以懲前而毖後矣除營求解委借口侵
蝕及爛糧敝舟等弊應聽津登督撫逐項查核
責令賠補外至於繇淮入海徑運遼島量減登
萊召買無仍津運稽遲及淮徐道果否可以兼
攝顧募外水船隻果否稱爲長便江北米價運
價應否酌註定額仍祈

勅下總漕并淮揚按臣督率司道等官從長計畫用
資恢勦大計亦以地方之事必地方官身在局

中者方能真見實行不致後來之紛呶也既經
該撫再題前來相應覆

請恭候

命下臣部行各該衙門一體遵奉施行

崇禎四年三月十一日具題本月十五日奉

聖旨島運不便從淮前已有旨船委等弊着孫元化
立法釐飭俾餉有實濟不必議更運道其誤遼爲
島知道了欽此

覆浙江催餉蔣岡卿起解錢糧疏

題爲類報兩次起解錢糧仰遵

明旨不時舉劾事專理新舊兩餉司案呈崇禎三年
九月二十二日奉本部送戶科抄出太僕寺少
卿蔣允儀題前事等因九月二十日奉

聖旨這起解銀數著到日磨對驗收各項錢糧若地
方官果肯悉心料理自無苦難蔣允儀著會同撫
按依限催完報命不得再延向鼎等准與紀錄嚴
鑑并唐永思等着該部議處還着撫按官查他治

行來奏該部知道欽此又該浙江巡撫陸完學會

題前事十月二十一日奉

聖旨已有旨了該部知道欽此又該巡按浙江監察御史李柄會題同前事十月二十一日奉

聖旨這舉劾徵解完欠各官着該部查議具奏欽此欽遵抄出到部送司隨即具稿呈堂咨行該寺并該撫按遵照督催仍令撫按查報嚴鑑唐永思等治行以便回

奏去後十一月十九日奉本部送戶科抄出因臣

蔣允儀題爲微臣遵限竣役恭報續解錢糧以足餉額仰祈

聖鑒事等因十一月十六日奉

聖旨蔣允儀催解錢糧完欠數目及議抵援兵支費等項該部查核明白具奏欽此又該撫臣陸完學按臣李柄會題同爲問臣復

命會查元二三年各項錢糧分別舉劾以昭勸懲事等因十二月二十七日俱奉

聖旨戶部知道欽此欽遵通抄到部送司案候起解

錢糧到完查收并候撫按查報唐永思等治行
到日彙查議覆間崇禎四年二月初二日奉本
部送戶科抄出撫臣陸完學按臣李柄會題同
爲類報兩次起解錢糧仰遵

明旨不時舉劾事回

奏嚴鑑唐永思等治行緣繇正月二十九日俱奉
聖旨該部知道欽此欽遵抄出到部送司除援兵支
費等項業於覆浙省援兵之費抵還迄無定議
一疏議抵已明無容再議外所有查收過錢糧

數目并舉劾各官相應核覆奏呈到部該臣等
看得同臣蔣允儀原催浙省元正三年新舊餉
銀七十二萬二千三十六兩九錢零新舊鹽課
銀二十二萬七千五百兩共承催新舊餉鹽課
銀九十五萬四千五百三十六兩零又帶催二
年分金花銀一十二萬九千六百三十五兩除
該省金花銀兩俱已全完溢額外其新舊鹽課
銀則於三年四月二十一日解官曲中如解到
八萬七千五百兩六月初二日徐光祖解到四

萬兩九月初三日韓瀾解到四萬七千五百兩
崇禎四年正月十九日雷學曾解到五萬二千
五百兩以上共解到部鹽課銀二十二萬七千
五百兩其新舊餉銀則於三年四月十一日解
官梅士程解到八萬五千六百七十六兩五錢
六月初十日俞大歷解到七萬四千六百七兩
九錢九分八月初四日楊策解到一十二萬四
百九十五兩三錢九分九月十六日秦以忠解
到一十一萬二千一百一十二兩三錢二分七

月十九日曹應宸解到一十二萬一千七百二十七兩三錢六分四年正月初十日丁士昌解到一十五萬三千三百二十四兩五錢二分二月十五日汪國軾解到襍項銀二萬兩又解驛遞節省鄉紳捐助抵補加派銀四萬四千三百六十兩八錢二分以上共解到部新舊餉銀七十三萬二千三百零四兩九錢連塩課通共解到部銀九十五萬九千八百零四兩九錢而此外坐銷遼米銀之六萬一千四百兩不與焉按

之原催之數頗多溢額此皆罔臣蔣允儀與撫
按陸完學李柄殫力督催多方籌畫所致其苦
心勞績業該臣部於去年十二月覆罔臣恭報
額外錢糧等疏將三臣首先敘錄題奉

欽依無容再敘者也至於舉劾各官在撫按會題罔
臣復

命疏內所開載者如海塩縣知縣田升年等松陽縣
知縣陳鍾鼎等俱與罔臣十一月內恭報額外
錢糧併襍餉徵派有額二疏相符先是臣部具

覆已經分別勸懲第罔臣之所舉者原以五分
之完欠定有司之規最者也今臣部見在查叅
各省直州縣元二三年十分完欠間有昔日五
分之所舉難免今日十分之所劾其前經紀錄
各官內有不係十分全完者仍應於類題之日
一體分別叅罰矣其餘今疏載在應敘之列而
核以三年十分之額未能全完者如秀水縣知
縣田見龍上虞縣知縣吳士貞武義縣知縣舒
自志開化縣知縣朱朝藩縉雲縣知縣陳世忠

皆欠一分以上應與所劾各官通俟類題分別
叅罰者也如杭州府知府萬國相金華府知府
陳其仁嚴州府知府吉天敘昌化縣知縣吳士
忠嘉善縣知縣蔡鵬霄平湖縣知縣顧垓嵊縣
知縣方叔壯太平縣知縣謝堅義烏縣知縣許
成楚署永康縣事金華府通判張聯璧浦江縣
知縣吳瓚建德縣知縣王忠遂安縣知縣陳太
綸壽昌縣知縣陳瑾以上各官有欠三五釐者
有欠七八釐者得免叅罰幸矣豈得濫徵勸揚

之典乎至於未完釐數而業經察處者又有嘉興府知府李仕亨於潛縣知縣郭光瞻嘉興縣知縣王驥桐廬縣知縣袁鶴冲又不待言者也外長興縣知縣向鼎天台縣知縣胡接輝金華縣知縣高倬新城縣知縣江之遠正祿全完急公可尚所當從優紀錄以示風勵者也既經同臣并撫按各具題前來相應題覆恭候

命下臣部移文各該衙門遵奉施行

崇禎四年三月十一日具

題本月十五日奉

聖旨蔣允儀等已有旨了向鼎等四員准與紀錄其餘各官還著分別類奏欽此

覆科臣條議屯田寺田官米積穀四款疏

題爲請申釐弊生財之略以佐時艱再明竭澤傷
心之說以祈

軫念事專理新餉山東清吏司案呈崇禎四年正月
二十五日奉本部送戶科抄出戶科給事中朱
又煥題前事等因本年正月二十三日奉

聖旨近因軍興浩費加派原屬權宜然窮民田僅畝
計所增不過分釐勢豪擁併膏腴豈得槩稱貧赤
至生員優免其中虛冒影借甚多總在地方有司

清覈得宜徵收不擾急公終事何至傷心這本內
所陳四事果否每歲可得數百萬軍民一體民加
三釐稱病軍加一錢猶便是否公諭寺田官米是
否各省直通有此項該部卽與朱文煥面商著據
實奏來欽此欽遵抄出到部送司相應酌覆奏呈
到部該臣等會同科臣朱文煥看得軍興浩費
庫藏如洗卽有搜括不過針頭之鐵而涓滴無
補於滄海也適者三釐之加派其生員之優異
臣等再四叅酌聊爲補葺以救眉睫我

皇上衡目前之權宜慮萬世之長計既爲軍興籌措
費又爲黔首慎徵收其不得已之深衷當無俟
臣言之再贅矣至於科臣朱又煥披陳四事又
令臣等面相商確蓋虛心採納欲求有裨實用
無徒以空文塞責者也今謹酌其可行者爲

皇上陳之一曰屯田查得屯田條議臣部曾有舊屯
新屯之分軍佃民佃之別新屯例應加課民佃
價宜倍增蓋於增課之中默示軍屯之重也先
是科臣汪始亨有疏臣部覆

准通查字內民佃軍屯又議腹裏屯田俱照民田起
科咨行省直撫按查報續據河南應天等處亦
有報者而增課無幾又四川雲南等處且稱民
糧起科更輕於屯田矣惟是南北風氣異宜榮
枯不同如河南山東江北地方班軍有更番之
苦運軍有飛輓之勞而閩粵江浙則有間矣邊
塞及兩京衛所祖軍自種者猶多至腹裏地方
則強半民佃軍屯矣夫民佃軍屯者價輕而息
倍坐擁厚利而

國家不得亨屯之利又閩粵江浙俱係水田所獲
不貲此科臣有慨於中而爲加增之議也但屯
田加課多寡臣部難以預定查科臣汪始亨酌
盈濟虛一疏迄今省直查核多未歸結似應責
成省直撫按嚴加清查果有如科臣朱又煥所
云得利獨饒者卽不必每畝再加一錢或於已
加遼餉之外再爲加增亦所謂取之而不爲虐
者也而新屯無糧者又無論矣此在地方各官
速爲酌定而毋徒爲築舍之議可也二曰寺田

查得寺田一項大江以北古刹頗少而江浙
廣處處有之百年相沿或爲豪強所霸占或爲
小民所影射卽在僧承種者亦不過百中之
耳則壤維均而以無糧之田地聽此輩之自私
自利非法之平也然各省田地坐落藩司自有
文冊款段昭然是在撫按立破情面未變價者
照數變價未納糧者照地派糧不許獨有獨辦
偏肥偏瘠若有抗違卽有叅處不得藉口寺僧
隱占私肥果其間有曾經納糧執有縣票申呈

者卽免重派可也三曰官米查得因地定賦有
派糧派米之不同而就派米之中又有官米民
米之不一據科臣謂田地無甲乙之異而官米
與民米所出之賦則有不均者如官米一石止
納金花三錢五分而加派不及如民米一石歲
納銀一兩三錢六分而加派在外此所以有應
一例均派之議也臣查賦役全書如江西湖廣
浙江廣東等處俱有官米字樣而官米有加派
與否開載未明難以臆斷是在該省撫按查議

果官米而免加派也自應照數加增無容再計
然事屬更張參酌宜妥必上不虧

國而下可便民此誠百年之永規而無徒爲眉睫
之計者也四曰積穀查積穀一項原在搜括雜
項九款之內奉

旨題定天下有司春夏折銀解部秋冬積穀備賑是
已以一半充遼餉矣臣部又於二年爲會議
經

宸斷一疏奉

旨題定又以秋冬十分之三充邊餉矣其餘留以備賑而有司未必盡完也科臣欲於原額之外再爲加增以充邊餉委屬長慮但恐賢者不能師蒲鞭之遺意而不肖者藉之以充私橐敎孫升木尤當預防查山東一省四年二月內該巡按御史高捷會同巡撫沈珣題嚴考成廣積穀一疏該省歲應積穀十萬而今積至一十六萬三千餘石備賑矣今後有司除解餉外有多積穀石者加以優異之典仍

勅撫按採訪有過取贖鍰於民者重加叅處亦積貯
隄防之妙用也以上四款果有數百萬之入則
加派優免亦可盡捐蓋錙銖俱屬有用之金錢
而搜括委稱濟急之要著臣等不敢懷局曲之
見而廢昭曠亦不敢執一成之法以繩軍民可
行者共効勛勩難行者勿滋紛擾是在地方官
加之意耳既經科臣具題前來相應覆

請恭候

命下臣部移文各該衙門酌議回

奏施行

崇禎四年三月十四日具

題四月初九日奉

聖旨這軍民新舊屯額前有旨清查未奏報的著該撫按速行確覈具奏其寺田積穀二項已經議欵申行至官米均派事屬更張恐婪猾官胥反滋民擾不必輕議欽此

覆畿楚鎮粵四省直屯田起科疏

題爲酌盈濟虛寬天下加派之半益屯損餉補師
中供億之繁以定中外以計萬世治安事專理
新餉山東清吏司案呈崇禎四年正月初七日
奉本部送戶科抄出直隸巡按御史袁弘勲題
前事內稱京衛及霸州昌平易州天津大名各
道屬通共加增民買軍田銀一萬一千八百一
十二兩九錢三分三釐八毫九絲六忽七微七
纖自崇禎三年爲始照數起解濟遼等因本年

正月初六日奉

聖旨這三年分民買軍田加增銀數著戶部覈查勘

永開內三道并與酌議具覆潼關蒲州何故屢催

不報依議著撫按查奏該衙門知道旨內糊字錯

寫餉字改正行欽此又該戶科抄出雲南巡撫王

伉奏同前事內稱查出侵隱發覺應照軍額科

糧歲得銀六百餘兩議留本省以俟另抵乾認

屯糧緣繇又該雲南巡按御史趙洪範會題前

事等因本年二月十一日俱奉

聖旨戶部知道欽此又該戶科抄出廣東巡按御史
高欽舜題同前事內稱通省屯銀除備支官軍
糧食外加派新餉共銀一萬二千九百零六兩
九錢一分四釐九毫遞年解部今崇禎三年連
前共派徵銀一萬七千二百零九兩九錢二分
一釐七毫零俱以崇禎三年徵納解部其每石
加派八分之例卽以三年停止緣繇本年二月
二十三日奉

聖旨戶部知道欽此又該戶科抄出湖廣巡撫魏光

緒題爲奉

旨詳奏事內稱暫從司議照糧包納實該銀二萬九千一百七十七兩二錢九分一釐八毫零解充餉銀等因奉
本年二月十三日奉

聖旨該部查議具覆欽此欽遵通抄到部通送到司案呈到部該臣等看得各衛所屯田原爲養軍而設故糧不甚重及後窮軍賤賣豪右侵肥既已受軍之產又復避軍之差肥瘠不均甘苦迥異此科臣汪始享有慨于中而有屯田起科之

議也隨該臣部分別具覆如兩京九邊止查其
佃買者起科而各軍自業者不問各省直則盡
照民田起科蓋因屯田久得輕徭之利少爲增
加原不爲厲後奉

聖諭講修舊章以復養軍之制止議民佃軍屯與上
納折色者量陞科則是不敢大爲紛更重賦以
貽地方之困也今按屯田御史袁弘勲疏稱在
京衛金吾左等衛共加增民買軍田銀三千八
十七兩二錢七分零在外衛涿鹿等衛共加增

民買軍田銀六百兩四錢八分零通州左等衛
共加增民買軍田銀一百二十四兩七分零

長陵等衛共加增民買軍田銀三百一十六兩五錢
五分零保定左等衛共加增民買軍田銀七百
二十八兩七分零天津左等衛共加增民買軍
田銀二千四百四十五兩四錢四分零真定等
衛共加增民買軍田銀一千五百七十一兩三
錢六分零德州等衛共加增民買軍田銀三千
九百三十九兩六錢七分零以上通共加增銀

一萬一千三百一十二兩九錢三分零此直隸
民買軍田加增之總數信足以符臣部之原議
矣若薊州永平關內三道慘罹虜變甫集哀鴻
徐議清查亦屬調劑但徐之一字卽伏玩愒之
端不爲拈出而一任悠悠恐三道屬終無清理
時矣相應責成撫按的擬何日舉行具文報部
於撫恤子遺之中不失釐剔積窳之意可也又
若潼關蒲州等處旣地隔三秦勢難遙制就近
清查最爲得策該撫按身任地方自有專責極

力清積弊無容辭者矣又按雲南撫臣王伉
按臣趙洪範疏稱該省軍多民少地之可耕者
十九在軍十一在民通省屯糧三十九萬六千
二百石有奇給通省官軍兵馬支用又因不敷
復增乾認丁糧一萬二千七百八十四石其起
科之則業已倍重民田似無容再加者矣但查
有隱占田三十頃零一十五畝四分七毫隱占
地七頃九十七畝五分四釐八毫既經責令各
軍將典賣者構價取贖隱占者退還本軍領種

照額納糧其田每年應納米一千二百六十四石一斗四升四合零其地應納麥二百一十三石三斗一升七合零二項共可折銀六百一十兩二錢五分五釐零此亦撫按清查之所得也及據該省欲將此銀留抵乾認之餉據議似屬有理但清查屯田之議原爲遼餉而舉倘仍爲該省之用似於原題有悖合令照數解部以濟薊遼之急想亦該省所不靳也又按廣東按臣高欽舜疏稱通省屯糧除每年徵納正米一十

六萬一千三百三十六石四斗三升六合有奇
存留本省備支官軍糧外天啓元年奉部文每
屯糧一石加派遼餉八分共加銀一萬二千九
百零六兩九錢一分零今又奉文照民田起科
連前共派徵銀一萬七千二百零九兩九錢二
分零俱以崇禎三年爲始如數徵納解部充餉
以資接濟其每石加派八分之例查照原行以
崇禎三年停止又按湖廣撫臣魏光緒疏該省
屯田議各衛所照卽陽衛四折例除原扣遼餉

八分外每石加米二斗每斗折銀四分共八分
實銀二萬九千一百七十七兩二錢九分一釐
零以四年爲始如數徵納解部充餉以資接濟
夫照民田起科原爲民佃軍屯避重就輕者而
言也臣等細覈諸疏如

畿輔所報則因民買軍屯而增者如滇雲所報則
因屯額重於民種無可議加惟就清出隱占田
地照額追徵以爲補助者粵東屯田照依民田
起科所增無幾如停止原派遼餉一萬二千九

百六兩外則止增銀四千三百三兩有奇暮四
朝三增此損彼似非實際况臣部前議照民田
起科免其原派遼餉者以民田原有加派在也
今屯田正糧仍以給軍則遼餉之外另應補解
蓋粵東地本沃饒增額無多合令仍存遼餉之
額再議酌增以助薊遼之用者也楚中屯糧每
石業已加徵遼餉八分今又復加八分似難再
爲深求况彼中屯田既有旱潦肥瘠之不同其
徵銀兩又有多寡輕重之不一誠莫若照依原

加遼餉之例每石加銀八分之爲得耳以上燕
滇楚粵除粵東原派遼餉一萬二千九百六兩
一分不計外通共增銀四萬五千九百零三兩
四錢八分有奇內粵東題認三年起徵其餘俱
自四年起照數解部但粵東原題免其加派遼
餉故以三年爲始今旣不准減免亦當自四年
始委曲衷益用助軍興庶不負科臣建議之苦
心也旣經具題前來相應覆

請恭候

命下臣部行文各該撫按遵奉施行

崇禎四年三月十五日具

題本月二十日奉

聖旨這畿楚滇粵清屯加增銀兩依議自四年爲始
照數解部而永開內新罹虜變徵解固應稍寬隱
占自宜釐剔着該撫按加意清查毋縱毋擾併將
起徵年分酌議具奏其潼關蒲州等處就近責成
各撫按俱與飭行欽此

覆唐京卿催解過楚省錢糧併舉劾疏

題爲正催已完帶催續解恭陳還餉難易遲速之
故仰候

聖裁事專理新餉山東清吏司案呈崇禎三年十一
月二十日奉本部送戶科抄出太常寺少卿唐
暉題前事等因崇禎三年十一月十八日奉

聖旨據奏楚省錢糧正催已完帶催續解併還餉難
易情形唐暉具見覲公其州縣各官完解獨早的
准與紀錄未解的着入覲時親齎交部舊欠預徵

不得濶抵京邊黔餉通融撥運俱着該撫按悉依料理責成所司該部知道欽此又該寺臣唐暉題爲恭報續解帶催銀數併陳各官勤怠仰乞

聖裁事十二月二十三日奉

聖旨這催解銀兩曾否如數實收著該部查明具奏其舉劾勤怠各官一併分別酌議來說欽此又該寺臣唐暉題爲遵

旨回奏事十二月二十三日奉

聖旨這督催楚省黔餉已經展限如何尚未全完着

該撫按嚴行催解不得玩延取罪唐暉念受劄在
後姑着該部再議限期具奏欽此欽遵通抄到部
送司查覆間崇禎四年二月初三日奉本部送
戶科抄出湖廣巡撫魏光緒題爲恭報續解帶
催銀數并陳各官勤怠仰乞

聖裁事准寺唐暉揭前事等因正月三十日奉

聖旨解銀照數查收勤怠各官酌量勸懲該部知道
欽此欽遵抄出到部送司除正催京邊錢糧如數
全完業該本部於去年九月內覆該差唐暉餉

事已竣而不敢言竣既具晰開明奉有這催到
楚餉核數不爽知道丁之

旨矣所有帶催過遼餉到部數目併舉劾各官相應
查核具覆案呈到部該臣等看得楚省加派襍
項向係留餉黔兵是以寺臣唐暉卿

命之始止承催京邊而不及遼餉繼而會議題

准割半還遼故並責之帶催及部劄達彼時已屆秋
矣夫以就便解黔者而令其改解來京則趨近
避遠不無觀望且楚地遼濶文移往返動經匝

月一旦不能輸來其間此寺臣所以有五難之
訴展限之請也謹按寺臣與撫臣前後四疏而
詳核之查得臣部續劄帶催加派銀三十一萬
六千有奇襍項銀六萬八千兩今計催解到部
者則九月十二日收解官崔維葑新餉五萬兩
十二月二十九日收解官班文煥新餉五萬兩
王文耀新餉七萬兩正月十四日收解官趙進
孝新餉一萬兩此外又有前按臣黃宗昌所解
捐搜銀四萬六千九百六十九兩原奉

旨准抵援兵所借黔餉今旣解部應筭遼餉之數又
解到預徵銀六萬五百兩卽寺臣原疏題明准
筭入三年之內仍令再徵以補預徵之數者也
又有兌發買銅銀二萬五千兩發買遼米銀二
萬餘兩發工部分餉一萬兩俱應准其銷筭以
上共解銷過銀三十四萬二千四百六十九兩
此到部帶徵新餉之數也而此外之續報起解
未到銀二萬有奇不與焉核以帶催原數所欠
無多其解官趙進孝正月十四日解到長沙府

屬之捐助銀七千一十九兩五錢又在承催之外者也夫以久假之餘瘠疲之地半載督催克完乃爾京卿唐暉殫力拮据可謂備極苦心矣查其舉劾各官原按五分完欠而論也今臣部見在通查省直州縣十分之完欠內除不係十分全完者不敢槩敘外武昌縣知縣王琇襄陽縣知縣王鰲永茲二臣者催科有法正襟全完所當從優紀錄以備擢用者也至於道州知州蔣騰蛟石首縣知縣陳中生寧鄉縣知縣陳臣

訓京卿疏議任俸示儆今查蔣騰蛟以不謹被
察不必再議陳中生陳臣訓俱以不及降級應
俟不日

覲叅一體分別議處者也其辰永衡寶四府柳靖二
州所屬藉口解黔空文塞責殊非政體應着藩
司吊查批廻勿得兩處支吾以滋躲閃倘係影
射卽當特疏糾叅無容寬假再查遼餉黔餉昨
臣部於去年十月覆四川總督朱燮元黔餉已
荷撥給一疏業經派定以湖南湖北就便解黔

以武漢黃承德荆岳勛襄九府悉解臣部覆奉
欽依遵行在案此兩便之道似不必再議通融二字
以啓後日混淆之端也至若展限一節查寺臣
具疏時維十月比時帶催錢糧尚未及半不得
不爲寬限之

請今除到部并續報起解在途者所欠二萬餘金耳
該寺凜凜

功令念切完公想此時亦可告竣無俟再議期限
爲也旣經寺臣撫臣具題前來相應查明題覆

恭候

命下臣部移文吏部將知縣王琇王鰲永從優紀錄
併咨寺臣巡撫及都察院轉行巡按御史遵奉
施行

崇禎四年三月十五日具

題本月二十一日奉

聖旨據奏唐暉帶催湖廣新餉已將竣事不必寬限
知道了該省黔遼二餉既經派定郡邑豈得復議
通融以滋混抵其辰永等處藉口解黔還着該撫

按查明具奏如係支飾卽行叅治王琇王鰲永准
與紀錄餘依議欽此

覆錢法堂條議三款疏

題爲泉府法久滋玩利權因時變通謹循職掌并
膚見仰祈

聖明採擇舉行以廣財源事專理新餉山東清吏司
案呈崇禎三年十一月初二日奉本部送戶科
抄出督理京省錢法本部右侍郎劉重慶題前
事等因本年十月二十九日奉

聖旨錢法原以濟用邇來奸弊叢生本息漸微國計
何賴這條奏各款清爐役追積欠及南北互查法

在必行以杜姦欺至一錢價議中引復當五當十
錢著該部詳酌妥便具奏欽此欽遵送司相應議
覆案呈到部該臣等看得生財濟用無如錢法
顧錢者泉也必疏其滯而流始通法者發也必
通其變而機始暢邇來奸役耗蠹於內緡商侵
蝕於外銅價日高錢價日賤息旣已微本復不
充弊長法窮倘不亟圖所以疏滯變通之策卽
使管晏司鑄未有能濟者也督理侍郎劉重慶
職掌錢法究心利弊條議清爐役追積邇及南

北互查三款外商內役無所容其欺隱業遵必
行之

旨通行申飭無容再議矣其議定錢價中新引復當
五當十大錢三款要在本厚息饒深有裨於軍
國謹逐款詳酌覆

請恭候

聖明裁奪施行

計開

一議定錢價古之談錢法者貴權子母夫

制者錢之母也或以價值高昂實違
延是母之利隨處其貴則子之息自亦
得獨賤矣兼以

三朝之舊錢與

昭代之新錢并行一時豪穢之勢有所不敵甚且美
惡不分公私溷雜於是民間營利者每
多其數以求售夫喜賤而惡貴者人情
也惡貴則新錢愈壅抑價以求售而亦
愈傷矣夫以從前之舊錢令其阻而不

行勢必有所不能若欲半於新錢之值
以示抑舊之意然皆

前朝之通寶於理亦有未穩也慮新錢之無息而定
價六十委屬便計但臣部所鑄之錢發
太倉作官俸者不過十之三而發邊鎮
作月餉者有十之七且奉

聖諭頒布各鎮定於六十五文稍爲更張恐各軍之
耳目未易厭也則新錢仍遵

欽定之數而舊錢所用之多寡亦當聽從民便者也

昔

神祖朝錢五十五文作銀一錢未見有舊錢之禁而舊錢自不能濶者何也

前代之錢體製輕小類於榆莢而萬曆通寶體製重大銅色精好是以舊錢不得與之爭衡也今之鑄錢者果能錢之分數不減銅無揅和之弊新錢自見其可貴貴則民未有不愛而珍之舊錢不期賤而自無不賤矣民之耳目旣易錢之數目可更

卽減之六十以倣

祖宗之舊未爲不可也伏候

聖裁

一復當五當十錢鑄錢之制自太府園法
以來或爲八銖或爲四銖至漢以五銖
爲得中矣我

祖宗祖制其意變其法有當十當五以佐儲計之不
足然皆暫行之而不可以爲常者正以
利久則弊生而

歷朝以來所用之錢多倣開元之製以其便民而可
久故也佐計者慮鼓鑄之無息而復欲

法

祖宗朝行大錢之法謂其於銅鉛有省工價又省亦
不得已之苦心也小民日用便於零星
而當十當五者不便分析有窒碍而不
能行大錢銅鉛配搭不均製度不精則
以一虧十小民豈能堪焉有所顧忌而
不能行惟是

一王之新製須洽一時之民情竊臣以爲當五當十者宜共先鑄十分之一布之五城務求銅汁精美仍須輪廓堅厚寶色閃爍如進

制錢式上鑄戶字以辨真贋如果通行不妨加鑄十分之二以漸而加民之耳目旣一則大錢不期行而自無不行矣復行五城御史嚴加緝訪有私鑄大錢者據實奏

聞置以重典亦防奸疏滯之一道也伏候

聖裁

一買銅中引查得古者鑄山爲利亦因利
於山也而今且易銅鉛於商民鑄本出
之

公家矣或本多則息廣尚可覲利於什一而况令
關稅局本楚餉而言僅以二十五萬計
也同官劉重慶苦心籌筭因倣邊商開
中遺意而有買銅中引之說查九邊額
引俱每年開中本色糧料以充主客兵

馬之用固無敢輕爲更易者獨查兩淮
綱法在淮南有二十二萬引歸積引既
盡業已補中新引除應納餘沒銀外應
該再徵引價一項而淮北七萬積引之
窩應以崇禎四年爲始亦當一例補行
新引又查引價則例每引五錢惟甘肅
以遠邊之故差減五分此兩淮之則例
也夫商人中引於邊上納糧料就時估
中尚得高下其值若先輸其引價買銅

上納則錙銖皆實較之爐商南商或先
領

公家之銀陸續買補捱延時日者又不可同年而
語矣復查原議每引買銅鉛實值四錢
者或亦事出創始不如是不足以示招
徠而按之引價原額與國課微覺有虧
若執定五錢之例恐商人惟利是視既
先借其資本而無息可圖終當裹足叅
酌於五錢之中量減五分庶上不虧

國下不虧商亦長便之策也且兩淮綱商惟恐奸
商鑽行浮課以奪其正窩今以新窩歸
之而但令納銅鉛中引則何憚而不爲
相應如議先給勘合批文責令綱商買
辦銅鉛解部交納臣部給文運司派引
行鹽其銅鉛照依近例搭配價值亦照
局內則例然須當年銷引當年買銅務
期清楚不得遲延致使局內徒有增本
之名而不得濟鑄之實可也如過期不

先行巡鹽御史嚴加追比不許關引掣
鹽果能如數買運源源不已歲可得息
五萬餘金以三年計之局內又可增息
一十五萬以充遼餉其引價本息該局
當隨鑄隨還無缺遼餉之額若其延捱
日久補還無期則非立法之初意矣再
查淮南改綱已定久有成議淮北綱法
未更尚費商量况買銅中引事屬創始
就中有無滯碍果否妥便仍當行文鹽

臣督令運司綱商再一酌議務期有利
無害而後可垂永利也伏候

聖裁

崇禎四年三月十八日具

題本月二十五日奉

聖旨鼓鑄之利須速催銅料製造精良自當接濟流
通無虞阻壅若權衡母子兩部豈無可暫緩銀兩
量爲轉移旬月間便獲餘息相生不已國用自饒何
未見設法開源但以條陳塞責大錢向多窒碍益

引未便紛更俱不必行欽此

題催省直新增加派三釐疏

題爲餉派雖增餉源幾斷新飭之

欽限久愆舊逋之續完絕響所

勅省直撫按嚴督司府按期速解以無悞軍興事專
理新餉山東清吏司案呈各邊約計每月主客
兵餉并海運召買價值每月該銀五十餘萬新
庫止見存不滿十萬三月未給四月又迫外解
稀絕脫巾可慮等因到部該臣等看得緩徵可
以紓民枵腹不能執及臣部養民者也加派催

督近於厲民而不恤總無奈東西交訌技窮於
持鉢而肘露於懸罄無策以緩兵勢不得不急
吾民耳客歲十一月中該臣遵奉

明旨敬陳剔釐禁約之規內將省直加派每畝九釐
新加三釐合盤打筭連襍項共該七百萬有奇
裁定分數立爲程限初限以正月爲期連預徵
三分應完加派四分二限以四月爲期應完加
派三分襍項三分三限以六月爲期全完加派
三分襍項二分四限八月襍項十分全完奉有

俞旨行文申飭在案又該臣同官侍郎周士樸目擊
餉儲不敷屈指初限已過具題額催二月十六

日奉

聖旨覲回各官正宜急公盡職豈得以計竣玩肆着
該撫按嚴督赴任應完新舊餉銀務期依限徵解
以濟急需其積欠緣繇仍着遵前旨作速查明回
奏欽此欽遵通行在案煌煌

嚴諭在外諸臣卽不憐同舟之誼匍匐臣部之仰屋
亦須切同仇之憤毬勉期會之白簡今何時乎

維暮之春矣問誰念切急公不爽初限四分之
約者則浙江止解過加派七萬六千七百八十
兩尚欠二分四釐江西省因壓徵故預徵五分
止解過三年分加派禱項共一十六萬七千八
十七兩尚欠二分一釐湖廣省除將四年分預
徵抵作三年分加派外止解二萬九千八百八
兩尚欠三分二釐福建止解過加派四萬一千
二百四十二兩三錢六分尚欠一分四釐河南
止解過加派一十八萬九千一百八十二兩四

錢尚欠一分九釐山東止解過一十三萬五千
四百七十兩尚欠二分二釐山西止解過八萬
六千六百三十五兩六分尚欠一分九釐陝西
止解過五萬七千九百一十八兩尚欠二分三
釐查延慶平三府停徵止該筭欠一分八釐廣
東止解過四萬一百五十兩尚欠二分七釐廣
西止解過二萬一千三百七十七兩一錢六分
尚欠一釐南直應天府止解過一萬五千三百
六十七兩六錢二分尚欠二分一釐安慶府止

解過五千九百一十四兩四錢五分尚欠一分
八釐徽州府止解過八千二百九兩五錢二分
尚欠一分五釐寧國府止解過七千七十九兩
一錢四分尚欠二分一釐池州府止解過一千
八百兩尚欠二分三釐太平府止解過三千七
百兩尚欠一分九釐松江府止解過一千八百
四十兩六錢尚欠三分七釐常州府止解過一
萬三千四百九十二兩三錢四分尚欠二分三
釐鎮江府止解過三千八百三兩尚欠三分七

釐廬州府止解過一萬八千三百七十三兩九
錢尚欠一分五釐鳳陽府止解過一萬六千二
百三十四兩四錢尚欠一分六釐四毫淮安府
止解過七千九十五兩九分零尚欠三分五釐
楊州府止解過一萬六千四百九十三兩五分
尚欠一分八釐徐州止解過三千八百一兩八
錢尚欠二分四釐七毫滁州止解過四百八十
九兩六錢尚欠二分六釐和州止解過一千二
百二十三兩七錢尚欠二分三釐六毫廣德州

止解過五千三百三十七兩尚欠一分五釐至
於四川省該預徵三分銀三萬六千四百三兩
四錢七分撫臣張論雖有咨會到部起解在途
然尚未有至京之日若蘇州府則寥寥然槩乎
未有聞也臣竊訝之將謂道里有遠近而以抄
春赴主春之程似可無煩奔馬將謂壤土有荒
瘠而勸大戶寬零戶之力恐亦未至束濕且省
直錢糧強半歲內開徵新餉緊急未有此時盡
在民者悠悠忽忽臣所不解若不力爲催督轉

瞬四月恐內急而外愈緩非所以信

功令將兵譟而民亦擾非所以忠

國計也臣竊謂初限二限全未解者定須於四月初解齊已解未盡者定於四月初解足三限四限務於鱗次而廣至可也附近省分惟山東河南完解最先臣部件歲借以應急今山東十九議歸登撫而預徵解到者又支給殆盡則河南北直南直浙江江西湖廣等處更望其蚤爲終事以濟然眉而北直所屬六府從來加派雨露

之偏厚有年纓冠之震鄰尤切當不待臣極
至矣臣非好爲疾呼以苦諸有司也總此有限
之輸將及時之雨所爭一先况夫不費之將助
當饑而饋寧忍落後關寧薊永之間月餉近始
清楚按月支給若復外解不奏三月已難點鐵
四月何處雨金壓欠不已臣不足惜封疆之事
將不堪言豈在外諸臣遂可秦越視耶臣部加
派雜項共計七百餘萬亦似殷然暴富而援兵
行月鹽菜經制未確有定餉而無定兵即使依

限完解猶慮一限不能了
一限之債而况新新
不接且陳陳積欠臣不知後來作何接濟也除
預徵三分原奉有

明旨開冊到部查叅姑俟省直將州縣職名完欠細
數報齊另行叅覈外伏乞

皇上天語嚴勅撫按立促司府將加派祿項照依原
立限期星夜解部以充春夏月餉其舊欠額餉
一併找解有司忌玩撫按摘糾一二以勸其餘
卽臣部亦不能循默無言自甘連餉之戚也恭

候

命下容臣等省覽無按申飭催解施行

崇禎四年三月二十一日具

題本月二十五日奉

聖旨這加派餉項軍興急需既立有程限如何拖欠
尚多著行省直各撫按嚴督司府依限完解仍着
自行回奏錢糧完欠全在考成清覈確示勸懲該
部每遇外解不繼輒請由飭及至考覈又徇情
祈寬是何政體今後還嚴行叅罰以信功令欽此

覆吏科條議近地州縣徑解錢糧疏

題爲

計典告竣宜嚴飭吏治以嘉惠元元事
新舊兩餉司
案呈崇禎四年二月初二日奉本部送戶科抄
出吏科給事中孟國祚題前事等因
本年正月
二十九日奉

聖旨據奏覲官復任還著該撫按時切體訪嚴加激
揚說得是解戶賠累總因貪官侵耗猾吏叢奸疏
稱近省錢糧州縣徑解不繇司府是否簡便戶部

酌妥來說所請考選科道不拘年分照缺限額以
杜濫觥着吏部詳查典例確議具奏欽此欽遵抄
出到部送司除吏治事宜聽吏部議覆外所有
近地徑解錢糧相應酌覆案呈到部該臣等看
得自遼事發難以來供億日繁催科日促民窮
財盡至今日而極矣顧惟正之徵輸難緩而無
盡之剝削宜釐卽如解戶一節其賠累牽連之
苦真有不可勝言者夫一錢糧也錙錙銖銖小
民不知受多少鞭朴有司不知費幾許心思

州縣而解之府繇府而解之藩司多過一層衙門則多用一番打點至有正糧少而使費幾與相埒此豈解戶之已資哉告幫告貼支蔓不已解戶還從中取利焉物力幾何堪此疊累科臣蒿目時艱悉心民瘼議將近省錢糧州縣不繇司府徑自解部誠窮則思變之權宜豈惟小民幸甚卽司府亦無所施其那移而錢糧且泉流於臣部至快計也但臣部方以完欠責成司府而司府得毋借口不開痛癢以完欠聽州縣之

緩急乎則又非科臣臆測

國計之本意莫合無地方遼遠者照舊布政司屬
解胥役不許需索常例附近地方如河南山東
山西及北直府屬非本地留用錢糧不論京邊
邊餉等項許州縣於該司府領批赴部交納其
批迴仍赴科院掛銷該庫卽出通關該司查明
卽掣給批迴仍赴司府銷驗若邑小糧少脚力
爲艱道路可虞情願彙解者仍從民便司府公
平兌收刻期立解勿得停庫別借致令州縣不

欠而司府反欠俾有李代桃僵之歎也敢因科
臣之意而潤色焉若夫添搭需索諸弊各府司
自當洗心馭下仰對

聖明之諄諭矣既經科臣具題前來相應覆

請恭候

命下臣部移文各該撫按藩司一體遵奉施行

崇禎四年三月二十二日具

題四月初五日奉

聖旨該部職司會計挈要提綱止須重考成嚴綜覈

自可釐弊裕儲不必輕徇條陳輒更舊制據稱
縣解糧司府每多那移欺隱卽着設法查考叅處
重懲該部知道欽此

會議登島兵餉額數疏

題爲微臣到任三月略述料理事宜以明臣窘以
祈

聖鑒事專理新餉山東清吏司案呈崇禎四年二月
十九日奉本部送恭蒙

御前發下紅本該本部題覆前事等因奉

聖旨孫元化力任恢復應從所請這奏內餉款或那
移別用或起解無期尚多虧欠至民運改給曾否
議定米數多寡內外懸殊事關軍需豈容空言爭

執但錢糧有限糜費宜核還著戶兵部科通盤核
算確酌款額數不得浮餉必欲實明白速奏以便
分任責成該衙門知道欽此欽遵本月二十四日

又奉本部送恭蒙

御前發下紅本該登萊巡撫孫元化題爲裁併管伍
酌定經制確報餉額事等因奉

聖旨這奏內兵餉經制事宜著該部科一併確酌具
奏述旨內脫額以字錯卸致字改補行欽此欽遵
蒙發到部送司遵卽呈堂咨會兵部兵科戶科

酌議隨於二月三十日會集中府衙門面相叅
酌三月初七日續准兵部回咨內稱看得物力
至今匱甚矣豈獨大農仰屋卽本部亦未嘗不
代爲攢眉是以登撫之

請前爲裁減四萬餘金夫豈得已今奉有錢糧有限
糜費宜恤之

旨又詎不欲再議減省獨計虛糜者銖兩亦可恤實
用者鉅萬亦難靳登撫旣任渡旅恢遼則舟車
馬步人官物曲之費據其經制所定似不容少

較之東江原額止增一萬二千而所定經制鑒
嚴精密較之薊遼最爲不浮使以登撫之經制
行之薊遼節浮汰冗數十萬金不難裁也旣奉
明旨欲戶兵部科通盤打筭則盈虛消息當不止就
登撫一處言或以全齊爲通盤而此留彼解或
以登遼爲通盤而此裒彼益戶部自有化裁妙
用本部亦何敢憑臆擅決也等因咨覆到部送
司酌覆間三月十四日奉本部送戶科抄出登
萊巡撫孫元化奏爲

奏繳三年分新管兵餉數目事三月十二日奉
聖旨該部知道前有旨着確酌錢糧欵額如何不行
速奏欽此欽遵抄出到部送司除一面撥補查銷
外所有兵餉經制欵項相應併酌具奏案呈到
部該臣等會同太子少保兵部尚書梁廷棟都
察院右都御史管左侍郎事王之采右侍郎朱
槃戶科都給事中玄默專管查覈餉務戶科給
事中許世蓋兵科都給事中仇維楨專管查覈
邊鎮兵馬兵科給事中馬思理會看得自有遼

事多難以來竭宇宙之物力全注開寧無非
恢復計也臣等持籌力索握筭術窮恨不得旦
暮恢復早奏掃犁之績登撫胸富甲兵志吞胡
虜一以獨力擔承固臣等所心服而樂成者也
舉大事者不恤厚費豈敢復有靳焉夫是以議
留捐助則留議留預徵則留昨且以齊魯額徵
新餉三年者通融兌抵四年者盡聽支銷而又
借撥東省加派二萬以應工部製器之急需隨
呼隨應亦可謂不遺餘力矣前臣部云恢復有

緒再請議加者蓋以經制未定給運有漸似不
必咄嗟取盈欲半留附近易完之額爲關寧緩
急資耳今登撫畫定經制臚列上

請內空月等銀有爲器甲營房用者原非臣部職掌
臣等卽欲再爲商駁而兵事尚速恐窮島之饑
薦絛錠不定金遼之釜魚刀俎久稽謹據所定
六營并用海備賑等項共一十五項通共官丁
匠役一萬一千七百一十五員名馬羸牛五千
四百一十六匹頭戰船一百六隻每月廩餉并

加增旅順全餉共二萬二千二百三十二兩
錢一分七釐六毫每月馬草乾銀三千五百二
十兩八錢每月船租銀一千六十兩每歲連閏
通共該銀三十四萬八千五百七十八兩二錢
二分八釐八毫每月該米五千三百三十六石
連閏歲該六萬九千三百六十八石每月該豆
六千二百五十九石二斗連閏歲該八萬一千
三百六十九石六斗聽照時估召買應用又
撫裁定原額島兵二萬三千二十三員名歲支

餉銀二十萬二千八百五兩二錢米一十三萬
七千七百一十八石登州食新餉舊兵三千六
百七十員名馬六百七匹戰船八十六隻歲支
銀八萬二千八百四十兩八錢以上有用之兵
實濟之餉苟利封疆孰敢不從前兵部於登鎮
新增六營中量行裁減船租銀二千二百餘兩
銃師襍役銀一千七百兩招練營內丁哨馬銀
三萬餘兩監軍下員役馬匹銀一萬餘兩共裁
省銀四萬三千九百有奇蓋亦重憐臣部之苦

而爲之酌濟耳若曰東多益寡損彼與此則登
撫旣欲求增餉遼豈肯議減又臣部所未敢任
者也總之三四兩年東省尚存新舊正襍各項
新餉共以八十二萬二千九百餘兩計俱抵新
舊登餉島餉之需而京庫給發運價船租之五
萬一百餘兩津門鮮運米之六萬八千石不與
焉臣部前疏已經題明免其解部而登撫所借
登庫餉銀亦卽在內統俟年終鉅算無容再議
其東省歲該民運錢糧一十三萬二千三百九

十兩四錢八分四釐原係遼鎮從前舊餉近年
全遼俱食新餉則前項民運應抵新餉之額名
曰幫支是以臣部前疏通融算入至於島米登
撫疏稱三年分尚欠八萬六千三百六十五石
或據島中實收而言除去津登失風之數臣部
備查買運之額尚多米二千八百七十餘石而
漂沒包賠則臣部向無此例也內外不一之故
儻在斯乎再查臣部前疏島米按崇禎元年舊
額故以一十六萬八千石計筭今查登撫總計

舊年借餉等事一疏開島米一十四萬九千石
百九十四石裁併營伍疏內又開島米十三萬
七千七百一十八石較之舊額已減省三萬餘
石則三年分島米之所多者又不止二千八百
七十餘石也以上節節打籌事事曲徇凡爲恢
復二字倒服耳若但遙制登萊或仍牽制皮島
又轉覺此餉之可惜也英雄定不欺人臣等可
無過慮善乎樞臣廷棟之言曰虛糜者銖兩亦
可惜實用者鉅萬亦難靳蓋登撫爲河東四衛

計綱繆故盡制曲防未免疾呼而臣部爲關鮮
兩地憂匱詘雖降心相從猶有餘吝想登撫爲
國家起見儻可節省必不坐視虛糜者也惟望早
奏蕩平以大費而成大省則封疆幸甚臣部幸
甚矣旣奉部科確酌具奏之

旨相應覆

請恭候

命下臣部移文各該衙門遵奉施行

崇禎四年三月二十三日具

題本月二十六日奉

聖旨這登島兵餉頭緒繁煩還宜逐款開列要見孫
元化所請若干該部所應若干其部應內要見京
庫給發若干東省留用若干其省留內要見某項
便可濟用某項尚須徵通又民運幫支定給何鎮
島米多欠是否漂流俱另疏詳明三日内具奏該
衙門知道欽此

覆津撫條陳海運十議疏

題爲條議海運利弊伏乞

天語嚴飭以警積玩以清餉務事專理新餉山東清
吏司案呈崇禎四年三月初六日奉本部送戶
科抄出津部翟鳳翀題前事等因本年三月初
四日奉

聖旨津門海運出入難稽積弊已久這條奏各款具
見加意釐飭該部卽與議覆欽此欽遵抄出到部
送司案呈到部爲照關寧士馬雲屯仰給津門

之海運

國家糧料億萬總賴舳舻之轉輸以故設有部院
司道府佐提掇稽察立法非不精密而法久則
弊生矣船戶凌次以爭管乾沒百出頑役影射
而蠹耗水濱難問津撫有慨於中所列十款率
皆肯綮孰嘗刻意釐剔誠不啻狂瀾之巨砥而
暗海之明犀也謹遵

明旨逐一詳覈以便舉行

一運官委任宜慎夫人情何樂於踴險紛

紛謀委或高坐津門或避海走陸不過
專藉需索吞啖爲囊橐計耳該撫議將
天津世職遴其端方謹飭曾經涉海習
慣者與廳委中之有身家行止者相參
委用更立一幫同運連保連坐之法信
斯議也將所云貓鼠同眠飄失掛欠之
弊或可漸次杜絕矣

一總運責成宜專夫設一官必得一官之
用津門原有餉道而復設有總運遊擊

若徒坐嘯津門漫無綜稽是直所謂
枵腹旒耳該撫議令每一運發總運尾
押其後查訪實收失風真偽看驗盜賣
挿和有無回日開報院道運官船戶不
待年終而卽行考察獎戒信斯議也豈
惟總運之職盡卽總運之權亦隆想遊
擊張允昌自饒爲之斷不肯以情向來
白簡也

一府廳裝卸宜親夫津門關寧俱各設有

管糧府佐乃多偃仰自便管糧而不親
問糧之虛實掛欠人之稱斯官也其謂
之何該撫議令嗣後發運不論截漕召買
責令天津兩廳躬自驗兌不假手于聽
用祿流一抵關寧彼處各廳卽速爲料
量收受短少插和親註實收不借叢于
倉官吏胥信斯議也船戶不至苦濡滯
而待命于風火之叵測委官無所平常
例而作崇于乾沒之多端則府佐之職

業舉矣

一兩地循環宜設夫錢穀之有循環所難
防侵漁而杜影射也而海運渺茫需此
尤急按籍尚爲鬼于司同去籍益養姦
于影泡該撫議立循環二扇津門兩廳
將逐月裝發石斛派卸信地備細開列
向遼撫關內外道倒換關寧四廳亦將
逐月實收數目到信日期有無挿和挂
欠備細開列向津撫衙門倒換信斯議

也收發對鑑而照海運一絲莫逃船戶
運官欲復遲速任意經年沉壓如船戶
曾元裝米千三百石踰歲曾無下落者
恐無此等神通矣

船戶體恤宜周愚人愛性命常不如愛
貨財故數萬水脚走長年于鯨波而如
鶩黠役愛資財終不如愛性命倘三尺
嚴核亦可杜侵剋之魚肉而惟謹該撫
憐船戶之死中作活憤幫長之針頭創

鐵不憚煩碎不厭叮嚀親驗其短少而
立促其算分否者以法律從事將幫長
之計窮而各衙門胥役之壟斷於幫長
者亦窮而今而後船戶其有甦矣

一召買折乾宜禁紙上之屯粟既不足養
士囊中之白鏹又不可充餐則海運之
自漕截者自津買者自州縣買者顆顆
皆百姓膏血粒粒皆關寧命脉也乃查
販包攬既折于水兌而船戶爲之乾運

船戶包攬又折于倉委而兵丁爲之龍
領三十鍾而致一石此輩之沉噬狼于
颶鯨矣該撫議令州縣召買俱委見任
佐貳押運本色兩廳允驗上倉取結卽
不得已而赴津平糴者亦須申文明白
聲說以便稽查將折乾之弊頓清而騰
飽攸籍矣

一斗斛較量宜均積役不得於折乾勢必
取償于斗斛輸之津門則曰津斛大而

津門代爲負謗於州縣輸之關寧則
曰津斛小而津門代爲任怨於關寧
爲斗斛以平之卽并斗斛而詭之矣該
撫欲斷其展轉較以畫一遵照部斛印
分各府州縣而斛大之說窮再印分津
關寧各廳而斛小之說窮或尚有刮減
底口鑿削裏面因而高下其手者惟以
三尺法繩之而鬼魅魍魎自無遁形矣
一失風真假宜核津門海運十餘年於茲

矣海晏効靈狂鯉戢暴千帆無恙三軍
加額已漸成輕熟景象矣偶爾飄失不
過百分之一二而奸頑船戶輒影射其
間非析乾數多懼露肘于較量則借支
銀夥開騙局于扣除劇可恨也該撫謂
經過有州縣巡海有委官遭風果確方
准開銷一或扶同運官連坐卽真正遭
風應追下脚等銀亦實實不貸而詭報
之賠補料不致悠悠日月果積胥之腹

失

一掛欠追比宜嚴允次折乾沿途盜賣水
落石出不得不懸爲掛欠謬曰下脚扣
抵後運帶交而歷運三四次經時一兩
年前後相仍竟付逝水此弊竟成海艘
痼疾矣對治之法惟有嚴追比而勿輕
聽其控豁重加等而惕之以性命該撫
持此不少假易庶可奪通運之積套而
還諸清楚已

一船隻幫次宜定欲得船戶之用宜平船戶之情無奈人情恣爲鑽營廳書操其緩急巧者連運三四次拙者歲僅得一次雖所爭只在水脚多寡之間而流弊將開浩費侵漁之竇該撫議將堅固船隻排定幫序應發糧料餉道挨序填單一樣二張一給船戶一行糧廳明開某船某處收卸不許更換小票一幫既完復及一幫領水脚之日同開洋之日同

信地交卸之日又同信斯議也幫幫魚
貫遲速既不相擠運運尾時緩急亦可
相濟固不止窮船戶之利也

以上十款皆洞中海運機宜曲盡船戶
利弊允宜亟爲釐定行既經津撫具題前
來相應覆

請恭候

命下臣部移文各該衙門遵奉施行

崇禎四年三月二十三日具

題本月二十七日奉

聖旨這海運十議既經覈覆着津遼二撫嚴督道總
各廳恪遵力行務使積弊盡釐餉裨實用不得但
以條陳了事欽此

覆楚省督撫軍餉并生員優免疏

題爲因新舊兩餉之詘體中外急公之心懇祈

聖明申飭裁定撫按協濟銀兩務斬全完以充實用
事專理新餉山東清吏司案呈崇禎四年二月
十三日奉本部送戶科抄出湖廣巡撫魏光緒
題前事等因本年二月十二日奉

聖旨該部知道本內商字錯寫謫字改正行欽此又
該該撫題爲虜患方殷財匱可虞乞

勅廷臣從長集議早爲設處以勿誤軍興事本年二

月初七日奉

聖旨戶部知道欽此欽遵通抄到部通送到司相應
併覆案呈到部該臣等看得奴難一日未平則
用餉一日難已故加派不足不得不搜及襍項
以補缺畧督撫軍餉生員優免皆襍項中之一
也查楚撫軍餉派于天啓三年額定一萬五千
而該省分毫不應是以臣部於崇禎元年具題
量減奉有督撫軍餉不准量減撫按復
命將兩項開銷完欠分數具奏之

旨煌煌

天語炳如星日諒撫臣必能樽節解助以副臣部之
望今據撫臣魏光緒疏稱該省兵餉甚薄每兵
日支一分各以無可搜助爲詞夫楚省地屬腹
裏兵寡餉薄則不能那彼益此以供關寧之急
者亦勢也旣已無可措處勢難硬坐或姑從免
派或仍照前疏量減其半聽該撫別項節省抵
解務在必完猶愈于懸空額而乏實濟別省不
得援以爲例至於生員優免奉

旨扣解定於三年爲始則三年之銀自應照數解

無疑矣乃該省青衿因舉有免過不許溷徵之

旨輒欲妄免三年之銀殊不思免過二字蓋指元二

兩年而非指三年也豈得巧借春間支過之語

希求倖免況此端一開則處處倣尤必有繼楚

省而呼籲者矣是減免二字斷不敢爲楚省寬

也但據該撫道不求減額惟欲稍寬期限擬於

四年春季徵完夏季起解則時日業已相當以

應准從若夫四年之銀必須秋各徵解務期年

額不愆否則該省日後必有藉口壓徵以蹈江西之覆轍者此不可不預爲申明者也旣經具題前來相應覆

請恭候

命下臣部行文湖廣巡撫并咨都察院轉行巡按御史遵照施行等因

崇禎四年三月二十八日具

題本月初三日奉

聖旨據奏楚省軍餉無可搜解何以奉旨數年未見

該省撫臣明白聲說至今方行乞免前魏光緒疏
稱全書可考還着該部詳查確奏不必兩請其生
員優免銀依議行

養熙兵月餉十月爲 疏

題爲酌請四年新餉以祈接濟事專理新餉山東
清吏司案呈崇禎四年三月十二日奉本部送
戶科抄出本部題覆川貴總督朱燦元題前事
三月初十日奉

聖旨依議但入援黔兵補食關寧缺餉該部作疏以
十月爲始今該省旣難責以供應則七八九月作
何抵給還著詳議具奏欽此欽遵抄出到部送司
相應議覆案呈到部該臣等看得入衛之旅行

糧取之臣部月餉出自該省原有成議惟是
兵一千二百餘名改客爲主填補關寧缺伍自
去年十月奉

命爲始昭關兵之例食臣部之餉矣則十月以前月
餉固不開臣部事也今

皇上軫念黔兵之遠戍而又已洞悉黔土之荒僻臣
何敢度外置之但各省勤

王俱食各省月糧惟川兵議四年爲始方取給於臣
部今黔猶之川也濫觴不止藉口難塞臣非不

欲稍爲權宜其間但查黔兵該省名糧每月九錢今各兵改食關餉仍貼防冷口日月食約近三兩一月而兼該省三月之餉裒後益前臣部似無負於黔兵卽按月索償黔兵亦終當問之該省耳臣等非敢以賦芋之術塞責也蓋援兵行月兼支之例原不可開黔兵改食關門之餉原屬變體不得不以

命下之日爲始必如是而後斬斷葛藤可以謝責於援兵亦可以索借於天下矣恭候

續文獻通考
卷一百一十五
命下臣部移文各該衙門遵奉施行

崇禎四年三月二十七日具

題四月初一日奉

聖旨依議

覆永平豫儲芻糧并減客餉主條議疏

題爲徵臣受

命巖邊敬陳練兵實著併地方事宜伏候

聖明採擇事專理新餉山東清吏司案呈崇禎四年

三月十三日奉本部送戶科抄出永平兵備道

副使方一藻奏前事等因本年三月十二日奉

聖旨這本說戰守機宜練兵製器等事亦見銳意肩
任併後二議中有減客餉主之說於目前要務大
有闕切該部卽確議具覆欽此欽遵抄出到部送

司除練兵製器事宜聽兵工二部酌覆外其餘
芻糧減客餉主二款相應摘覆案呈到部該臣
等看得治餉者能委曲以儲餉而不敢問食餉
之爲何人治兵者知如額以索餉而未必諒措
餉之或不繼乃道臣方一藻蒿目兵食兩難之
際焦心軍民兼濟之策爲干陬計綢繆耳爲輸
輓慮匱竭而鯁鯁焉豫儲芻糧且欲減客餉主
也敬遵

明旨而酌覆之夫永當殘破之後地畝牙稅凡爲應

糧工食資者一切無出皆取給於臣部臣部亦
不重惜露肘悉索以應如客歲九月徇令該鎮
餉司先發舊兵月餉銀二萬七千一百四十兩
及時召買又陸續發過新餉銀二萬二千五百
兩派撫寧昌黎樂亭三縣召買米一萬石豆三
萬石另派買草五十五萬束以期接濟近又請
先截漕米十萬石以七萬運薊以三萬運永亦
未嘗不豫也道臣所謂豫者蓋指意外戰守不
妨多多益善耳俟該鎮餉司兵道將已發過召

買截漕完欠確數報部仍俟外解稍奏再爲金
冬來春面接濟之著可也若夫減客餉主臣部
有此心而不敢開此口卽鹽菜一項臣部移咨
督撫商求長便而驕子護乳脫口爲難况敢越
俎而問尺藉之去留哉且勦奴之兵果多何害
於餉勦奴之餉果多何嫌於兵臣雖惜餉終不
敢附會減兵也迨恭繹

明旨云於目前要務大有關切又深有味於減客餉
主之說真見夫養百傷卒不如養一健兒養十

悍橫淫虐之徒兒不若養一親上及長之子弟
兵道臣軫念地方言必有中故若斯耳因查道
臣標下官丁七百五十二員名除馬乾本折外
月支銀一千三百餘兩先經臣等會議裁減可
減者經自刪去可減而未便棄置者仍令分發
各營今道臣云制虜急在需才靳脩必至散逸
欲以餉客兵者稍移而餉主兵此其意蓋謂荒
城初復哀鴻未定雖邀如

天之仁伍兵每月加銀一錢以秋成爲止而兵民終

欽定四庫全書
御批歷代通鑑輯覽
卷一百一十五
宋紀一百一十五
高宗皇帝
建炎三年

困夫桂王主客兩窘於輸將欲將客還王位
沾客餘耳查求鎮住防祖帥六營與冷口貼防
之黔兵大半隸藉關寧關寧距永不遠呼應甚
易酌量抽還信地以待聲援卽鹽菜一月可省
數千金而本折不待言矣兵難遙度道臣云姑
舍戰言守局中審視必明於所以守者倘自精
征繕收囤漸有成着猝爾緩急有可恃以待援
則不妨與該督撫從長講求於主客去留之間
上之無誤地方保障之計次亦不貽臣部匱乏

之憂可耳是在樞督撫臣自有主持非司餉者
所敢越俎而獨斷也既經該道條奏前來相應
覆

請恭候

命下臣部移文各該衙門遵奉施行

崇禎四年三月二十八日具

題四月初四日奉

聖旨這永鎮召買截漕并酌議接濟知道了其減客
餉主事宜還着兵部及該督撫詳酌具奏欽此

題催省直解還援兵借過部餉疏

題爲急催援兵久借之額餉以濟匱乏事專理新
餉山東清吏司案呈爲照新庫如洗自去歲四
月至本年三月各援兵借去月糧無一解還除
宣大固原甘肅寧夏撫兵孫顯祖尤世祿副撫
兵王國靖守備蒲應龍等官兵四千九十四兩
真保定州守備朱寵祿慕繼勳等官兵一千六
百八十八兩陝西守備祁大信李愈盛等官兵
六百六十三兩共借發過布花銀六千四百四

十五兩俱扣抵應發年例外四川副總兵卹恤
官等借過安家月糧九萬八千五百一十三兩
二錢六分內除解到四萬五千七百六十八兩
尚欠五萬二千七百四十五兩二錢六分湖廣
副總兵陳學貫官兵借過月餉一萬二千五十
一兩一錢八分五釐廣東叅將蔡時春官兵借
過月餉五千二百六十四兩二錢二分七釐八
毫以上共借過月餉銀七萬六十兩六錢七分
二釐八毫又借發過布花河南叅將蔡忠遊擊

芮琦等官兵三千二百六十兩五錢四川叅將
饒勲都司周維先等官兵三千二十四兩五錢
山東副將劉澤清都司王嘉爵守備程虹等官
兵一千三百三十六兩五錢福建守備鄭涇官
兵七百三十九兩浙江副將袁大寧副總兵劉
嘉言官兵二千二百二十三兩廣東叅將蔡時
春官兵五百八十八兩五錢貴州總兵胡從儀
下加銜遊擊林耀官兵一千一百五十四兩五
錢湖廣叅將張景珠都司常經官兵二千七百

七十八兩以上共代發過布花銀一萬五千一百四兩五錢其各省直俱無一人投批補解相應題催案呈到部該臣等看得自己已奴做變出意外天下勤

王之旅颺餐雲集皆待哺於臣部臣部爲之措行糧增塩菜未已也又借給各援兵布花禦寒而取償於本地復以本地月糧未到時時向臣部借給此不過以

皇上金錢養

皇上將士而屑瑟曰借呼籲曰還不幾過濟

宸聽乎但新餉原有定額客借去一分則主減去一
分客之月糧借去一分卽客之行糧塩菜亦減
去一分勢不得不銖銖取償者且臣常三請輕
齎漕折以應關寧夫豈真有餘力以應援兵之
急哉暴露可憐則不忍不借脫巾可慮則不得
不借此罔臣部爲封疆權宜計耳若在外諸臣
料定臣部之不忍不給不得不給而有借無償
緩急任意則勤

王何名設心當不若是愬也先是臣於本年正月有
浙省援兵之費抵還迄無定議一疏奉

聖旨這浙兵行糧路費依議於該省元年稌項內抵
給其三年裁站銀兩有旨留充馬價應否借作家
家衣裝著再與兵部確議來說至月餉自有坐糧
并軍器盛甲等項俱着該撫按自行設處銷算據
稱這兵月糧路費車船腳價種種重支是否糜溢
還着該撫按核酌回奏援兵煩費各該地方官都
要加意節裁多方籌畫以展急公之誼凡會同該

部借過月餉給兵的一一如期解補不得玩延取
罪該衙門知道欽遵在案將近五閱月矣而解補
者寥寥且借乞者踵至豈臣部爲不涸之淵乎
及今源源而來主客尚可通融不然償者不償
借無可借不至主客交困不止則臣部之所大
恐也卽如四川割還臣部遠餉銀一十二萬而
該省援兵行月鹽菜每月近一萬五千兩計此
十二萬兩不足供川兵十月之需乃蹉跎徵解
者旣不能照應於當饑展轉吝惜者又不能體

念於奸還真是秦人之肥不顧越人之瘠矣臣
所不能爲該省直解也伏祈

勅下臣部移文省直撫按將借過月糧布花銀兩星
速解部以救眉睫之急其於閩寧所濟非小補
矣

崇禎四年三月二十九日具

題四月初三日奉

聖旨這入援各兵借過月糧布花銀兩着各該撫按
如數解部補還不得延緩該衙門知道

覆入援川兵行月兼支疏

題爲川兵萬里勤

王春餉望支孔亟懇乞立

勅解發仍准塩菜月米以廣

皇仁以安士心事專理新餉山東清吏司案呈崇禎
四年三月二十三日奉本部送恭蒙

御前發下紅本該順天巡撫劉可訓題前事等因奉
聖旨川兵遠戍宜恤但餉有定制月糧塩菜應否兼
支著速行酌妥按月解給不得以會議稽延致煩

額請該部知道欽此欽遵到部送司案查三月十八日該本司說堂內稱案查川兵月餉先該本部題議三年以前仍令該省自行解補四年以後本部將該省加派通融供億有不敷者仍令該省自行接濟薊鎮援兵應否改客作主并月支銀米塩菜聽督撫從長確酌速奏奉

旨通行去後至今未准

奏報議論未定目今川兵行月餉銀仍當照例姑行按月給發無容遲滯者也先准順天撫院咨

會原剩有部發銀五千六百十九兩七錢二分
四釐可作正月餉銀除移文順天撫院給發外
此外不敷銀兩餉司應爲找補合無劄行薊州
餉司文到之日卽給二月餉銀一月每名一兩
五錢月米在內此外仍照例與鹽菜銀九錢口
糧米四斗五升先行接濟免致呼庚正月餉銀
鹽菜行糧并行找給今先發銀一萬兩遠行解
往等因呈堂照行去後續據薊州餉司主事蔣
範化呈爲懇請按期發餉接濟軍需事內稱薊

鎮二月分新舊餉銀俱於三月初五日以前業
蒙本部陸續完發派運得以如額支放似無欠
缺矣第一月之餉僅供一月之需而軍兵一日
無糧即便忍饑一日原未可中斷者茲三月之
餉時已過半尚爾派發無期縱其間或有應支
未領如川兵前鋒各營塩菜行糧自正月後未
據投單赴領似覺稍有餘地忽於三月十六日
投到號單正月至三月共計折色銀一萬六千
八百有奇原係役過月分自應照數補給已經

隨到隨發外此猶額內之需也乃若川兵月餉
一項向繇本部經發遵陽原與薊庫無與也茲
於三月十二等日據前鋒等營委官陳文智等
所投支冊亦自正月至三月共月餉銀二萬五
千四百八十九兩零雖錢糧另有項款出入各
有所司而遠戍窮兵三月無糧忍不爲之一接
濟乎除一面移會撫道查酌外業將正月分月
餉共銀八千五百九十餘兩通融借給是或可
以少濟川餉之窮然凡茲主客援兵此月應支

者實無以應之則三月分新舊餉銀能無望本部之速賜派發也至於川兵所支前項月餉銀兩尤祈本部蚤爲裁示或應作何補還庶便遵行銷筭等因奉批新餉司查議酌發有薊撫揭一併具題批送到司相應遵

旨速行酌覆案呈到部該臣等看得川兵無家遠戍逾秋涉夏唾手而復還城抵掌而探虎穴臣等極壯之憫之該省月糧已奉有

明旨三年以前借過該部的仍着該省照數解補四

年以後遵

前旨於遼餉支銷矣臣等何敢固執而不以鼓敵愾也唯是月糧與塩菜並支原非經制久客卽主臣等妄意尚可裒益遵

旨與該督撫從長商確而不謂督撫之延久而不決也川營之巧挾以必從也正月之塩菜銀未停閣未領遲至三月始一併投單立索又併索三個月餉乘餉司之窘而責以備持主餉之急而關其口于是將領不得不徇士卒該撫不得不

狗將領而臣部又何敢措一辭夫其謂黔兵不
邀定議是矣然林耀平文綬周鴻圖王新民各
兵在部給餉固未支塩菜也謂改客爲主不便
是矣然貴州許成名兵題補關門車營缺額暫
支塩菜回關卽止客安在不可作主也臣捧誦
明旨曰餉有定制曰應否兼支是洞悉臣部之艱於
措餉而爲之慮矣臣部雖冒加派之名而各省
逋欠者約計百二十餘萬登撫議留者約計八
十萬秦晉之憂方大召買之價不貲其他意外

供助未易強爭而安能指未定額之新派與正聚訟之優免以救此涸鮒也乎其不得不量節援兵之口仍充援兵之腹者勢也非得已也所可原者川兵旣屬有用之兵遵陽又係首衝之地今關寧援兵旣見在兼支則川蜀援兵自未免比例故已增者不可復減而同體者不能異

視

明旨不許以會議稽延蓋隱然枵腹脫巾之長慮也查川兵三月鹽菜行糧見在薊州倉庫已經給

發月糧臣部止發一萬合以遵城所存五十六
百餘兩亦可支兩月之用視他主客官兵俱不
爽期會矣欲裁未能隨索卽與抑又何求獨念
奔波與休息勞逸不同鋒鏑與偃仰安危不同
秋冬之寒苦與夏日之舒長時序又復不同異
日閑寧援兵終有撤時因時畫宜臣部尤于督
撫有厚望耳旣經具題前來相應覆

請恭候

命下臣部移文各該衙門遵奉施行

崇禎四年三月二十九日具

題四月初四日奉

聖旨川兵給發月餉知道了督撫官宜與戶部同心
商確早定經制何得漫無料理聽憑籲請有虧體
國籌邊之誼

兵餉增耗并出入大數乞從長酌議疏

題爲兵餉日增月益物力不支謹以出入大數據

實披陳懇乞

聖明從長酌議以圖久遠以定畫一事竊照自軍興
難以來竭宇內之物力合加派裸項數百餘
萬計輸之遼左而坐糜養癰曾無收於已已
之變一爲悵岷今額內之兵餉分毫難減而額
外之兵餉層累增加臣部之在今日主客有交
困之勢行月無兼資之策每每屈指計筭仰屋

咨嗟真未卜所稅駕也請得備陳於

皇上之前以舊額新餉官兵之寧遠鎮原額官兵
六萬七千七百六十九員名馬騾三萬八千一
百十四頭歲支兵餉馬乾船租等銀一百六十二
萬三千四百三兩四錢今自去年九月起月
放銀十萬八千六百八十二兩五錢歲計共該
銀一百三十萬四千一百九十兩零又關兵在
薊月支銀一萬七千兩歲計共該銀二十萬四
千兩山海鎮原額官兵二萬九千六百五員名

驃一萬八千六十三匹頭歲支銀八十八萬
一千五百五十二兩七錢今自去年九月起月
放銀四萬五千八百九十六兩二錢九分零歲
計共該銀五十五萬七百五十五兩五錢一分
零薊州鎮原額官兵一萬四千五十員名馬騾
一千四百三十四匹頭歲支銀一千九萬五千
一百七十二兩四分二毫今崇禎四年三月初
一日准順天巡撫題報新定經制新餉官兵一
萬四千一百八十八員名馬騾一千一百六十

一匹頭月該銀二萬二千九百三十七兩六錢
五分零歲計共該銀二十七萬三千二百五十
一兩八錢二分五釐密雲鎮原額官兵一萬二
千九百二十四員名馬騾二千九百八十六匹
頭歲支銀二十六萬一千二百四十四兩六錢
五分九釐又召買料草銀一萬五千兩今新定
經制官兵一萬三千九百六員名馬騾駝二千
九百九十四匹頭月支銀二萬六百四十七兩
七錢四分七釐歲計共該銀二十四萬七千七

百七十二兩九錢七分永平鎮原額官兵七千
九百十員名馬騾一千三百四十七匹頭歲支
銀一十七萬八千三百八十兩九錢九分八釐
今新定經制官兵衙役一萬八百二十四員名
馬騾九百八匹頭每月該銀一萬七千一百九
十九兩六分零歲計共該銀二十萬六千三百
八十八兩八錢四毫天津原額官兵三千五百
六十七員名沙船四十三隻馬四百一匹歲支
銀六萬五千八百一十六兩四錢崇禎三年三

月內臣部覆

准新復正振兩營官兵四千二百四十四員各通共
歲計該銀一十四萬三千六百八十七兩六錢
五分六釐登萊巡撫孫元化裁定河東官兵二
萬三千三十三員名歲該銀二十萬二千八百
五兩二錢登州舊增食新餉官兵三千六百七
十員名馬六百七匹戰船八十六隻歲該支銀
八萬二千八百四十兩八錢以上舊額新餉兵
馬通共該銀三百二十一萬五千六百六十二

兩七錢零、額外新增兵馬之通州鎮官兵
五千一百五十七員名馬一千七十匹每月支
銀一萬二百兩八錢六分五釐零歲計共該銀
一十一萬九千二百四十三兩九錢九分昌平
鎮官兵五千一百五十八員名馬騾一千五百
七十七匹頭月該銀一萬五十八兩一錢九分
九釐零歲計共該銀一十一萬九千五百六十
一兩五錢九分六釐涿州鎮官兵二千五百九
十一員名馬六百一十四匹月該銀四千八百十

五兩八錢歲計共該銀五萬七千七百八十九兩六錢登鎮該撫裁併營伍疏內經制六營弁用海等項共十五項共官丁匠役一萬一千七百一十五員名馬騾牛五千四百一十六匹頭戰船一百零六隻歲支銀三十二萬一千七百五十七兩四錢除兵部裁減四萬三千九百兩外實該銀二十七萬七千八百五十兩四錢團練營王威并忠義營官兵八千四百五十七員名月該銀一萬八百四十二兩八錢六分歲計

共該銀一十三萬一百一十五兩五錢二分
鎮奉

旨新募官兵三萬九十六員名馬騾七千二百匹頭
月該銀五萬三千三十五兩四錢歲計共該銀
六十三萬六千五百四十四兩八錢以上新增
新餉兵馬通共該銀一百三十四萬一千一百
一十二兩一錢零各處入衛援兵之團練
營王威下官兵二千五百五十三員名馬騾二
千四百五十六匹頭三屯營都司常秉忠下官

兵一千六百三十一員名馬騾五百一十六匹
頭防薊湖廣鎮軍營陳學貫下官兵二千九十
二員名馬九十匹固原副總兵李鴻嗣等官兵
二千八百一十一員名馬二千二百五十三匹
四川遊擊胡雲鳳等官兵五千六百七十六名
馬二百二十三匹宣大叅將尤寵等官兵二千
三百六十四員名馬七百三十五匹寧夏守備
李學牧官兵四百六名馬一百八十三匹山東
遊擊張其煊沂州官兵五百三名馬一百八匹

統領南兵總兵鄧玘等官兵八千一百三十八
員名馬一千六百八十二匹河南副總兵楊大
慶等官兵二千三百九十六員名馬一百八十
四匹軍門標下守備龔國棟等營共官兵五千
一百四十四員名馬九百一十九匹而團練營
并忠義營八千四百五十七員名之官兵亦在
此數內附支塩菜米折也防密河州營千總長
捷下兵二百七十員名馬二百八十九匹雲南
遊擊祿洪官兵一千四百三十九員名馬騾二

百十匹頭甘肅總兵楊嘉謨官兵一千九百七
十八員名馬騾二千一百九十七匹頭牟文綬
官兵二千一百四十二員名馬六十七匹防永
貴州總兵許成名官兵一千一百一十二員名
馬五十六匹山海正武右部叅將劉邦域等營
官兵九百七十員名馬騾一十七匹頭總兵祖
大壽官兵一萬三百二十五員名馬騾五千八
百七十七匹頭防通薊廣總兵高勳官兵二千
三百九十員名馬九十八匹浙江副總兵袁本

寧官兵一千二百九十七員名馬四匹防津浙
江副總兵劉嘉言官兵三千五百七十三員名
廣東叅將蔡時春官兵一千一百九十員名福
建守備鄭涇一千四百九十九員名防昌河南
叅將芮琦官兵一千一百八十一員名余夢麒
官兵一千一百一十一員名馬一百八十二匹
陝西守備陳三畧官兵二百九十六員名又西
寧守備魯胤昌官兵二百九十八員名馬三百
二十四匹山西勦捕流賊林耀官兵二千四百

五十二員名四川恭將楊鼎家丁二百六十名
援防宜府總兵補顧祖官兵一千三百員名馬
一千五百四十六匹湖廣恭將張景珠官兵八
百八十三員名馬二百匹西寧守備祁大信官
兵一百四十八員名西寧都司李愈盛等官兵
一百九十五員名馬一百八十八匹防守山海
四川總兵秦翼明官兵一萬員名馬騾三百四
十匹頭候調王新民官兵一千三百五十九員
名馬十六匹以上援兵共八萬一千九百七十

六員名馬騾共二萬八匹頭除秦翼明年文綬
王新民官兵單支月餉歲該銀三十萬八百一
十三兩六錢實支塩菜兵六萬七千八百八十
一員名歲計塩菜料草約該銀一百六十九萬
八千一百五十六兩七錢以上三項以歲計
之共該銀六百五十四萬五千七百五兩
九錢又額新增名召買遼米遼豆草束
併關鮮海運價值共該銀一百六十三萬四千
五百二十兩三錢八而閏月之餉銀塩菜與

薊永漕糧之運價約該五六十萬不與焉合之
則八百七十餘萬矣此今日兵餉出數之大約
也查加派襍項歲額日九十餘萬新
增加派三釐一百四十餘總計不過七百三
十餘萬耳而工部分餉之二十萬亦在其內卽
使如數全完尚缺百六十萬而况未必全完也
此外尚有省直捐助向來賴以接濟而今後不
可異矣員優免遲延不辦尚無確南部事
例屢疏題留尚成盡餘此今日錢糧入數之大

約也。臣總計出入滿盤打筭計兵給餽正有此數。多用一分卽缺一分。在額內者旣減之而無可減。則在額外者欲增之而無可增。不知此嗷嗷待哺者將有天雨地湧之金錢否也。客旣奪主之食。主必受客之困。坐糜厚糈。未必見德。而壓欠守候。必且含怨。所謂主客有交困之勢者此也。入援之兵月糧取之本省行糧取之臣部。屢奉

明旨。而今且何如乎。其支行糧也。認爲應得之物。按

期取索且圖預支其借月糧也挾以必與之勢
一借不已視爲定例當該省解餉未至惟恨不
能那此與彼及旣借後竟以膜外置之聽臣部
之號呼而裹如克耳矣臣部卽有點鐵之術何
能分身匹應所謂行月無交資之策者此也况
簡查舊例フ派襍ハ歲入逋負每至十分之二
新增三釐額尙虛懸而各省以灾疲求免者已
次第見告矣リ秦晉之間議留議蠲或割歸工
部或抵還舊餉方且瓜分無餘幾於望梅難問

卽歲前之預徵三分三月以來支用殆盡而外
解且中斷矣當此兵驕將悍食苦衆而用不給
已犯生財之忌值茲勢窮力竭兵當恤而民堪
念徒深仰屋之嗟於是節之一字至於今日而
臣萬萬不能諱矣昔日敵據遵永其鹽菜增加
用以鼓其敵愾之氣今處處修備在在增
募而援兵之供億如故也聞諸道路之口似謂
衝邊必不可撤而腹裏似不妨量撤兵之有用
者必不可撤而兵之無用者政不妨量撤今通

津昌涿之間閩楚東粵諸兵久冒清人河上之
誼一切餽餉該省既不能源源而至臣部又不
能舍已耘人倘亦可早爲酌處否也如團練營
雖曰防薊原係

都門新募主兵曩者出防薊州不加給鹽菜則不
能成往因今遂爲定例矣行月兼支長此安窮
儻亦可以量爲酌減否也川兵旣屬客兵又同
薊兵而食部餉之蜀餉已不還也而行月亦苦
兼支臣念其萬里遠戍比照關兵厚糈每月

議餉一兩八錢、有秦兵之成例在、乃川兵要
挾不、頃接薊撫咨文、又再與塩菜以厭其欲、
推之而忠義營之兵、亦復皆然、如孫顯祖防
宣官兵、係本將在籍召募、其在城下、曾與團練
營一體支餉、今援宣矣、旣在臣部支月糧、又在
宣鎮支行糧、此又舊例所無、而今創起者也、推
而應援山西饒勲林耀之兵、亦復皆然、又查
從來大將、非統領數萬之師、未聞有開鎮者、自
有入衛之役、而建牙纍纍矣、官役公費等項、多

者以千計少亦數百計又有援兵不滿千人而
聽用各官多至四五十員者果人人皆韓白之
選乎不過以市獐之流冒沐猴之冠耳則裁冗
官冗役以明節嗇而杜冒濫似亦目前之急務
也至於召買海運煩費不貲而關寧援兵支行
米又支月米獨不可一本而一折乎馬匹料草
有支本色者有支折色者卽折色亦有一兩二
錢與九錢之異者當茲青草漸茂獨不可改本
爲折改多爲少乎雖謀

國者不恤小費以防大詰而持籌者當量入額以爲出孔今行月無一不取足於臣部主客無一不責望於臣部所入有限所出無窮及今而不額呼於

君父之前待軍餉不繼庚癸頻呼而後言之嗟何及矣尤可慮者竭澤焚林識者寒心剝肉補瘡終當立盡釋此經制初報之時不詳爲更定而日鑿生民之元氣竭萬姓之膏血以供四方之驕悍無論勢必不繼卽令繼矣恐亦非久安長治

之道也。願我

皇上之深長思也。伏乞

勅下樞部督撫從長酌議。但得樽節一分。則臣部受
一分之賜而

國計民生均賴之矣。

光緒四年三月二十九日具

題四月初五日奉

聖旨據奏摠計兵餉出入大數加派之外尚缺額五
餘萬委宜深慮本月應酌諸欸着兵部卽與該部

撫從長確議具奏又如祖大壽兵應摠策入關寧
王威團練營已稱額外新增及王新民兵俱又列
援兵欸內是否重複鄧玘所統南兵係何省入援
及軍門標下一欸一併查明來說